

寧澹齋

全集

館課

文部六制語二

寧



寧澹齋全集卷之十一

右春坊右庶子兼侍讀楊守勤撰

制語二

原任浙江布政使司左布政司陳所學并  
妻誥命一道

制曰明王守在四夷特嚴鎖鑰之寄人臣望隆  
百辟斯膺節鉞之權肆新命之初頒安攘攸賴  
邇舊庸之夙懋屏翰是崇爾原任浙江布政使  
司左布政使陳所學識時俊傑斷國謀猷歷粉



署而絲絨風清典名邦而袴襦惠洽范士羅垂  
棘之壁詰戎掃冀北之塵爰以運籌折筮之功  
隨有賜金增秩之命而爾志堅恬尚勇退急流  
泌衡之請數聞東山之望彌重迫于屢召始強  
起于八閩比及三年乃累勞于全浙計先桑土  
溟渤偃其狂波戒絕繭絲闐闐霑其閩澤憲辟  
允兼文武殿邦久著華夷茲旣晉爾都察院右  
副都御史巡撫山西矣仍以舊伐授爾階通奉  
大夫錫之誥命於戲馭戎以治內爲先懷遠惟

望實爲重爾宜威沙漠有昔日之京觀在焉而  
周歷藩垣則於牧寧茲土猶輕車耳醜虜之情  
形具在目中邊境之虛實如指掌上尚益存嚴  
翼式固爾猷朕將藉以舒黼辰之憂爾亦與有  
彤弓之賞欽哉

制曰屏翰宣勞國享謚寧之治閩惟協德臣弘  
康乂之猷從爵已逮坤貞增秩宜申吳命爾原  
任浙江布政使司左布政使陳所學妻累封淑  
人成氏揚休女史儷媿詰人滌澹以事尊章謹



佩璫服觴之度。龜勉以襄大業。勵瞻星儆旦之勤。爾夫敷歷七官。而清如寒素。藉爾儉迴翔三省。而惠浹膏濡。資爾慈蘭芬與棠蔭。俱垂閭範。暨程書並耀。是用加封。爾爲夫人。迓龍章而游寵。躬燕譽以增修。

祖父母

制曰。記稱貽厥之仁。延于數世。詩咏績戎之烈。標此萬邦。嘉藩屏之成勞。遡慶源之長發。國有彝典。家曰殊恩。爾贈中大夫。山西布政使司右

叅政陳守廉。乃原任浙江布政使司左布政使。所學之祖父槃阿碩。隱枌杜耆英孝友。爲政于家庭。操履無慚于屋漏。徜徉泉泌。時叩角而授經。表正鄉閭。每望廬而却步。以引以翼。耄期不倦。于勤是訓。是行啓佑。咸正無缺。輩起珪璋之彥。聿隆岳牧之勲。憲而乞言。儀已崇乎六豆。義以率祖。寵宜錫乎重綸。是用加贈。爾爲通奉大夫。浙江布政使司左布政使。外階已躋乎極品。後祿方迓于無疆。



制曰朕聞德應星占者肇興宗之慶和諧鳳卜者開昌後之祥繫陳氏之休禎古今一轍肆王朝之渥典祖妣並隆爾贈淑人黃氏乃原任浙江布政使司左布政使陳所學之祖母性稟坤貞德兼隨順庭幃之孝養素篤閨壺之雍穆彌昭白首相莊肅齊眉于式案青箱世授勤執硯以示規宜子孫之繩繩迓庥禎于奕奕康侯最績王母疏榮是用加贈爾爲夫人載崇烝畀之儀永享綿延之祉

父母

制曰宣力王家人子資以廣孝崇恩禰廟朝廷藉以酬庸惟堂構之相仍錫茲禎榦斯絲綸之屢被賁乃橋梓爾贈中大夫山西布政使司右叅政陳篆乃原任浙江布政使司左布政使所學之父心存古樸行著表儀一孝動天迴驚瀾于傾覆四維振俗薰多士爲善良友于枕被之風已肇發祥和氣利賴麥舟之義式昭裕後仁心生平之言行足嘉啓佑之旬宜可紀新膺筦



鑰寶耀箕裘是用加贈爾爲通奉大夫浙江布政使司左布政使名奕世以不磨言累成而如  
綍

制曰萱帟孺慕歷盛顯而彌深楓陛寵褒至再三而罔靳蓋子奏外藩之績假鉞且新而母荷內階之升積恩從舊爾累贈淑人戴氏乃原任浙江布政使司左布政使陳所學之母性秉慈祥德承溫惠鷄傳帷下蚤收敬助之功荻畫膝前並稟愛勞之訓初羨多賢峙鼎如三鳳誕集

天門近聞南國歌棠若二龍評高月且雖暢加隆于象服旋悲缺養之烏雛茲加贈爾爲夫人宰木動乎淒風恩華溢于零露

湖廣布政使司左布政使王一楨并妻誥  
命一道

制曰國家隆岳牧之任屏翰攸資荆楚繫湯沐之鄉藩垣尤重嘉膚功于左轄膺寵渥于中朝厥有恒章宜申渙命爾湖廣布政使司左布政使王一楨亮節貞操宏猷雅度大廷擢對文成



華國之章望邑司符治擅宜民之譽迨踐更手  
戎部詰禁惟嚴暨分屏于粵藩旬宜益茂爰躋  
楚臬飭軌度以肅糾虔游陟薇垣秉寅恭而弘  
保又穆穆素絲之節式是百僚芄芄膏雨之歌  
洽此四國允矣文武爲憲居然方岳具瞻是用  
授爾階通奉大夫錫之誥命於戲江漢經營已  
著殿邦之烈苗民跋扈方切震鄰之虞尚厯未  
雨之綢繆益謹無形之釁孽庶聲靈遐鬯合黔  
蜀以嚮風而德教誕敷見華夷之率服是稱良  
翰勿替訓辭爾其欽哉行有後命

制曰藩翰宣勞國享泰維之慶閩關協德臣宏  
咸乂之勲洵伉儷之相成宜褒崇之游被爾湖  
廣布政使司左布政使王一楨妻累封安人沈  
氏毓質溫恭禔躬雍肅在饋謹湘盛之節儀以  
無儀舉案洽賓敬之風德能配德樂存綦縞承  
卑服于在公度秉山河佐委蛇于退食闡則暨  
程書並耀蘭芬偕棠蔭俱垂是用加封爾爲夫  
人六珈載錫允同君子之光四德彌虔常顯令



妻之譽

父母

制曰四岳旬宣君得臣而弘化一經啓佑父因子以顯名樹棠之績方新式穀之謨永著逮重綸于禰廟躋峻秩于外階爾累贈承德郎兵部車駕清吏司主事王世祿乃湖廣布政使司左布政使一楨之父奎璧英儒琳瑯粹品孝友爲政雅孚月旦之評恬澹維風獨挽波流之靡勞愛最成乎詰胤勲猷丕顯于价人偉江漢之歌

功邈弓裘之襲吉是用加贈爾爲通奉大夫湖廣布政使司左布政使紫誥登頒賁九京而增耀玄扃不寐承三命以益恭

制曰爲王効蓋不憚鞅掌之煩非母靡依宜體劬勞之念故生旣蚤違乎鼎養而歿則游被以封章爾累贈安人徐氏乃湖廣布政使司左布政使王一楨之母柔嘉婦順聖善母儀惟布甘貧克副冥鴻之志篝燈佐讀雅著和熊之規薇省揚芬機杼之言猶在萱闈錫祉柘捲之痛彌



深是用加贈爾爲夫人紹周召二南之化令聞  
孔昭同申許兩國之封榮施罔旣

原任廣東布政使司左布政使臧爾勸并  
妻誥命一道

制曰朝廷嚴節鉞之權猷資藩屏岳牧懋旬宣  
之績望重封疆肆頒新命于朔方特遡成勞于  
嶺表宜申渙號用答豐功爾原任廣東布政使  
司左布政使臧爾勸乃原任南京兵部右侍郎  
贈南京工部尚書惟一之子家傳端亮世篤忠

貞接武彤廷踐更粉署錢穀甲兵之數綜核維  
精典章禮樂之司寅清特著持衡學憲羅俊又  
于關中敷歷臬藩樹干城于吳會由中州而蒞  
東粵自右轄以陟左垣而爾益勵靖共彌勤保  
乂穆穆素絲之節表是庶僚疊疊纘服之猷聞  
于四國封靡捐而兢練合節西河騰膏黍之歌  
聲靈播而溟渤無波五嶺藉苞桑之莫茲旣晉  
爾都察院右副都御史巡撫寧夏矣仍以歲閱  
授爾階通奉大夫錫之誥命於戲慎乃有德明



主所以守四夷式固爾猶康侯用以俾率服矧  
賀蘭當醜虜出沒之地防禦孔艱而鎮城值孽  
首跋扈之餘承平未久網繆徹土尚繩克詰遺  
謀干羽舞階益暢保釐舊烈庶國有無疆之慶  
家亦有無疆之休欽哉

制曰良臣奏方岳之勲介圭用錫淑媛表山河  
之範從爵有章式表徽音重加顯號爾原任廣  
東布政使司左布政使臧爾勸妻累封淑人王  
氏毓質溫恭持身淑慎在饋謹湘盛之度儀以  
無儀舉案肅賓敬之風德能配德儼爛而襄世  
業課職惟勤曳縞而佐雄藩靜琴在御績奏蕃  
宣音傳敬助是用封爾爲夫人游被鸞綸寵賁  
六珈之貴益申燕儆永資一德之猷

是爲彝典豈曰息私爾江西布政使司右叅政  
劉毅遂識宏摹冲襟遠度蘭宮擢俊咸推才望  
制曰朝廷置岳牧之司叅知特重臣子著旬宣  
之烈倚眷方隆嘉三載之成勞霈九重之渥寵  
是爲彝典豈曰息私爾江西布政使司右叅政  
劉毅遂識宏摹冲襟遠度蘭宮擢俊咸推才望



之英粉署宣猷雅著兵刑之譽惟文經而武緯  
迺踐臬而跼藩歷齊魯閩粵之郊樹綱紀藩垣  
之績載遷江右益表邦楨詰禁修戎默杜無形  
之釁清郵汰冗節適孔道之衝穆穆絲絨之風  
式是列辟芄芄膏黍之誦洽于百城茲旣晉爾  
廣西按察使矣仍以歲閱授爾階中大夫錫之  
誥命夫嶺右爲羈縻之域政貴得人而憲長揀  
約束之權道先惇德惟詳內畧外斯近悅而遠  
自來必正已帥人乃風移而倍自易務益宏乎

駿畧庶永副乎龍光爾其欽哉母廢朕命  
制曰績最殿邦由价人之忠飭化先宜室藉淑  
媛之助勩乃式序之典方崇而靜好之音已香  
可無追卹以慰幽原爾江西布政使司右叅政  
劉毅妻封恭人童氏賦性幽閑禔躬淑慎脫簪  
佐餽雅推桓汲之風解佩贈知夙著樂機之度  
旦傲允資乎聽鑰宵箴克勵乎瞻星善柔感胤  
祚之祥雍肅協刑于之化睠名藩之上考嗟徽  
嫔之久摧是用贈爾爲淑人賁彤管以若新耀



黃墟而不夜

祖父母

制曰夫効忠宣力之士志隄下僚而留餘衍慶之祥功光奕葉洵天道之不爽徵國命之有常爾原任直隸鎮江府丹陽縣縣丞劉勲乃江西布政使司右叅政毅之祖父業振箕裘望隆奎壁一同贊政表清譽于哦松三徑未歸適幽貞于友石恬澹得紀省子之養身世無營謙抑追魯恭士之風耄期罔倦留硯聿興喆裔高門蔚

起叅藩是用贈爾爲中大夫江西布政使司右叅政荷明綸于有赫垂秩祐以無疆制曰祥開長發鳳鳴卜五世之昌慶洽价藩鸞誥錫重闈之祉禮特均于烝畀恩弗替于幽遐爾沈氏乃江西布政使司右叅政劉毅之祖母德秉溫柔性鍾勤儉拮据佐政篤靜御于瑟琴澣濯服勞翼清操于槐竹老猶持續雅傳思善之規惠著含飴茂起興宗之彥聞孫奏績王母疏榮是用贈爾爲淑人誕受芝函之寵式據芹



斛之思

父母

制曰人子懷顯親之思貽令名則必果國家隆  
勸忠之典推式穀以特崇肆褒樹屏之宏功載  
湔過庭之遺範爾生員贈朝議大夫山東布政  
使司左叅議劉聖乃江西布政使司右叅政毅  
之父黼藻弘文孝友爲政披肝示膽侃直夙著  
于旦評矜懇賑窮信義雅推于宗黨佑啓之規  
模丕裕業擅弓裘生平之清白可嘉功光似續

惟茲樹駿流鴻之績無非口傳心授之猷是用  
加贈爾爲中大夫江西布政使司右叅政龍章  
生松嶠之輝馬鬣賁槐庭之祐

制曰蓋聞畫荻成賢懋啓勞臣之節芟崇布德  
實推慈母之恩故生旣享以鼎茵而歿必申以  
綸綍爾封太恭人李氏乃江西布政使司右叅  
政劉毅之母稟矩尹吉儷媿孟歐組紉孔修庀  
膏滫而盡孝被僮秉度尸蘋藻以惟虔賓莊凜  
梁案之風勞愛篤栢丸之教澣濯勿弛于已貴



儉法葛覃栝菴乍棄于從官悲深藩屏是用贈  
爾爲淑人重綸慰良翰之遐思渥澤表名家之  
內訓  
湖廣布政使司右叅政兼按察司僉事劉  
不盈并妻誥命一道

制曰朕惟荆楚爲方岳具瞻旬宣攸寄承德尤  
陵寢重地保障惟嚴匪藉壯猷曷攄偉畧矧累  
勞于閱歷宜錫祉以酬庸爾湖廣布政使司右  
叅政兼按察司僉事劉不盈魁閎卓犖之才冲

遠博碩之器初升軒對周踐起曹節儉夙著于  
羔絲幹濟特隆于鳩署臬藩洊陟聲實並隆貞  
度飭綱兩浙之風猷丕振安民獎吏三晉之藩  
屏彌崇載轄荆西分巡楚甸而爾銷萌震疊居  
安慮危涓郢波恬歌甘棠于南國蔡申風靜庀  
肩鑰于北門經文締武兼資惠日嚴霜交頌蔚  
矣勛勳三載居然節鉞一方是用授爾階中大  
夫錫之誥命夫桑扈歌功乃戢難之是戒烈文  
錫福由封靡之弗崇功大而居之以小心斯功



益懋寵盛而持之以折節斯寵益崇爾磨練于  
水銜者旣深將流閱于駿烈者必遠豐績允昭  
于竹帛榮階竚陟于鼎衡欽哉

制曰良臣衛國如威豹在山哲婦宜家若鳴鷄  
戒旦惟幃房之繼美來朝宁之重封爾湖廣布  
政使司右叅政兼按察司僉事劉不盈繼室封  
宜人田氏坤柔育德與順禔躬孝敬睦親內則  
聞于宗黨溫恭有禮外言不越閨房慎脩鞶褱  
之儀穆助羔絲之節爾夫宣威藩服爾績助順

室中是用加贈爾爲淑人爰載揚乎贊冊以茂  
闡乎徽音

### 祖父母

制曰蓋聞施澤于民者深德無不報樹勲于國  
者大開有必先肆嘉屏翰之功宜遡詒謀之善  
爾原任山東兗州府同知劉卓乃湖廣布政使  
司右叅政兼按察司僉事不盈之祖父直方自  
性耿介持身蚤擢賢科歷敷吏治鳴琴壯邑諭  
民回強使之風剗耄方州約已布綏和之化迨



宣猷于佐郡益殫力以導河疏滄有成方覩馮  
夷之效順拮据盡瘁遂聞豎崇之邁殃而遺澤  
如存仁人於焉有後价藩奏最祖烈藉以彌光  
是用贈爾爲中大夫湖廣布政使司右叅政兼  
按察司僉事奕世流清白之輝三廟衍箕裘之  
慶

制曰楨幹本于蓋臣詩咏績戎之烈介福受于  
王母禮隆烝畀之儀爰錫祉于重闈特疏榮于  
三命爾許氏乃湖廣布政使司右叅政兼按察

司僉事劉不盈之祖母淑慎貞閨循良賢相願  
違偕老能濟變于茹荼志切亢宗佐詒謀于式  
穀勤儉永垂遺範子孫藉以多賢四岳奮庸信  
祥麟之錫美百年興慶繇占鳳之克昌是用贈  
爾爲淑人孝思隨手澤俱長淑聞與褒綸並耀  
父母

制曰國非宏遠之才罔崇保障士抱奇偉之素  
斯大構堂名世必有自貽幽光所宜亟闡爾國  
子生累贈奉政大夫工部屯田清吏司郎中劉



寧波府志卷之四十一  
惟恂乃湖廣布政使司右叅政兼按察司僉事  
不盈之父孝友天植恭儉性成駿譽夙馳而訥  
乎若抽象賢在望而歆兮若忘迨弓冶之蚤捐  
慮常華之零落義存讓產靡貽患于分荆量善  
納汙爰著聲于化盜仁不必壽後乃克昌睠茲  
徽省之勲庸寔藉椿庭之佑啓是用贈爾爲中  
大夫湖廣布政使司右叅政兼按察司僉事昭  
燕翼以方新介龍章于未艾

制曰無競維人表膚功于南服靡依匪母篤永

慕于北堂肆酬罔極之恩爰有申重之命爾累  
封太宜人高氏乃湖廣布政使司右叅政兼按  
察司僉事劉不盈之母躬有令儀嬪于華胄佐  
砧問寢竭色養以承懽脫珥資膏儼躬勤而迪  
哲操彌堅于歌鵠功克就于嘗熊澹泊不艷紛  
華課識罔希祿養蕙音已暢萱景不延栝捲之  
遺思至遠猶在干城之嘉績爲寵方隆是用加  
贈爾爲淑人用紆風木之悼疊增泉壤之光

河南布政使司分守河南道右叅政董光



宏并妻誥命一道

制曰朕惟伊洛帝王所履夙號名區漚澗天地之中今稱沃壤矧親藩之肇建藉良翰以獨隆駿烈懋彰鴻恩游逮爾河南布政使司分守河南道右叅政董光宏亮節貞操雄謨偉度祥刑鳩署明允夙稱慮讞閩邦平反特著爰遷學憲久歷中州旣踐臬而蹈藩亦經文而締武薪禱式擴旁蒐濟世之英桑土預防丕樹殿邦之績當桐封就國之日殫力經營值曠寇跳梁之秋

收功掃蕩絲絨允儀乎百辟干城永壯于兩河是用授爾階中大夫錫之誥命頃以奴酋匪茹羽檄交馳雖中土又安宜奮同仇之志而各邊要害不無震動之虞行陟爾秦關綏我西鄙何以逆銷虜釁永固藩籬何以鼓暢皇靈共圖犄角益展勛勤之畧用紆宵旰之憂欽哉

制曰价人維藩豎鴻謨于四國君子偕老宜象服于六珈特申從爵之章用示酬庸之典爾河南布政使司分守河南道右叅政董光宏妻封



宜人林氏毓姿端敏秉德孝恭茹苦承驪每切  
牛衣之泣織紉佐讀雅追雞旦之規曳綦縞以  
從官嚴操扃鏘潔蒸嘗而主饋瑞應芝蘭績奏  
蕃宣眷傳敬助是用加封爾爲淑人載膺鸞鳳  
之章益勵矜肇之訓

祖父母

制曰國有濟美之臣不顯亦世家有象賢之胤  
無疆惟休蓋裕後本于承前而發祥徵于來裔  
仁昭豐芑祉邇璇源爾原任山東濟南府泰安

州同知董潛乃河南布政使司分守河南道右  
叅政光宏之祖父才品兼長文行兩擅懷忠體  
孝克遵柱史遺風鑄古銘今夙著成均雅譽席  
珍弗售乃展驥于監州署篆有聲遽懸車于故  
里力崇朴素洛社奉其儀刑敦尚矩彛章縫視  
爲模楷燕翼特深存硯鴻猷懋闡升卿是用贈  
爾爲中大夫河南布政使司分守河南道右叅  
政恩綸垂奕世以如新秩祐歷百年而未艾  
制曰國有疏榮之典風勸臣工禮推似續之原



空齋齋全集卷之七  
制言  
褒崇祖妣惟紀績于价人宜受福于王母爾原  
任山東濟南府泰安州同知董潛繼室王氏乃  
河南布政使司分守河南道右叅政光宏之祖  
母稟規善族作儷名門秉孝敬以承尊相循良  
而肅梱前徽穆紹鞠埒于鳩慈後祿弘綏昌  
熾符其鳳卜旬宣最績芹斛永懷是用贈爾爲  
淑人祇承芝檢之頒益衍雲初之庇

父母

制曰朝廷衆建藩垣恒資儒碩臣子光昭德業

必本義方惟是父是子之有成斯如綉如綸之  
洵被自天申命爲國彛章爾原任江西南安府  
通判贈奉直大夫刑部山東清吏司署郎中事  
員外郎董蔡乃河南布政使司分守河南道右  
叅政光宏之父孝友爲政仁厚宅心冠冕著于  
虞庠整弧推于胄監方州佐治屢敷棠蔭之陰  
藩幕質成丕暢薇垣之澤筭篁未御竭鞅掌以  
奉公薤露遽歌留忠嘉而啓後功高岳牧慶協  
構堂是用加贈爾爲中大夫河南布政使司分



守河南道右叅政表重光于作述流景耀于春秋

制曰崧嶽降靈甫乃稱乎周翰莘桑毓瑞尹始陟乎商衡嘉偉樹于叅藩滌深恩于吹棘爾贈宜人王氏乃河南布政使司分守河南道右叅政董光宏之生母性溫以惠寶儉與慈順序有常夢天吏而與之子愛勞並切勗先君而作之師當其砥勵官箴而勿渝荆布迨夫拮据家難而力勉箕裘昭婦德于幽貞洵母儀之聖善是

用加贈爾爲淑人永彰畫荻之功庶釋遺捲之痛

河南按察司整飭密雲兵備副使喻安性并妻誥命一道

制曰國家奠鼎燕都特慎四夷之守憲臣握符雄鎮允資千里之猷必經文緯武以兼宏斯內治外嚴之並賴膚功旣奏寵渥宜申爾河南按察司整飭密雲兵備副使喻安性履潔操貞器弘識亮李曹宣職冰署寅清矢忠讜于掖垣振



風猷于藩臬睠惟昌鎮及彼檀垣寔陵寢之咽  
喉繫神京之肩臂爰從特簡秉節要區而爾悉  
慮綢繆殫精克詰躬素絲而表庶位霈膏雨以  
潤群生足食足兵快覩飽騰之勢有嚴有翼允  
舒震疊之靈鞏鎖鑰于北門卓爾勛勩三載壯  
干城于左輔居然節制一方是用授爾階中憲  
大夫錫之誥命邇者奴酋跳梁方切門庭之警  
邊防積玩尤懷心腹之虞何以審固荒屯何以  
用資撻伐尚出萬全之筭肇敏戎功庶釋九重  
之憂永介爾祉

制曰折衝底績國寔賴乎勞臣伉儷同心家必  
資乎淑媛卽御琴之乍棄宜從爵之再申爾河  
南按察司整飭密雲兵備副使喻安性妻累封  
安人周氏華族儲英哲人儷德居念姆師之訓  
動循環珮之音在饋服勤勉相篝燈之業從官  
敦儉猶甘綦縞之風方資籌畫于檀雲遽謝芳  
徽于蘭湘遺桂可閔懿範猶存是用贈爾爲恭  
人追颺彤管之芬永播黃墟之耀



父母

制曰鐘鼓官而聲聞無忠不報鶴鳴陰而子和  
有開必先肆嘉殿邦之勲載聞肯堂之自言屢  
成而若縛命緣是以有常爾原任湖廣郴州興  
寧縣知縣累贈承德郎禮部祠祭清吏司主事  
喻思化乃河南按察司整飭密雲兵備副使安  
性之父京省名魁漢寧茂宰值苗蠻之反側殫  
力經營憫黎庶之瘡痍悉心撫字清徭抵餉預  
銷庚癸之呼興學敷文允格鴟鴞之性觸蠻烟

而盡瘁身殞封疆望碑峴以志思榮分俎豆鴻  
猷未竟適開保障之英憲績方隆懋闡弓裘之  
緒是用加贈爾爲中憲大夫河南按察司副使  
師中三錫表舊勩以渙新綸異命重申遡燕貽  
而光馬鬣

制曰王臣効蓋弗辭鞅掌之煩母氏劬勞彌切  
終身之慕故存旣弗逮乎鼎養而歿猶屢錫乎  
褒綸爾累贈安人王氏乃河南按察司整飭密  
雲兵備副使喻安性之母孝恭秉性貞靜宅心



膏髓承尊聞內言於不出桃蕢宜室約闡服以  
無華操杼而佐儒修名成歌鹿和九而規哲胤  
兆啓祥麟悵捲澤之含悲嘉龍光而錫祐是用  
加贈爾爲恭人露萱游被乎新恩風木遠紆其  
徃悼

陝西按察司肅州道兵備副使李應魁併  
妻誥命一道

制曰朕惟肅州孤懸荒徼與虜爲鄰所爲內固  
金湯外扼喉吭克武圖功以救寧于茲土惟兵

大夫責也其有展經緯之略以大安攘之勲者  
錫祉酬庸尤亟巴爾陝西按察司肅州道兵備  
副使李應魁才猷博大蘊藉宏深擢對明廷儲  
材秘館玉署之搜披時富烏臺之彈壓宏多爰  
晉秦藩載叅憲臬而爾值三面受敵之地爲百  
年無事之謀勵冰蘖以表庶僚風猷丕著冒星  
霜而貞衆度嬉懦頓消緩帶輕裘運籌策于樽  
俎之上投戈講藝倡忠義于勇敢之中簡募飲  
飛壯軍聲于超距繕增俾櫟固疆圉于徹桑戎



寧海府志全集卷之四  
索不馳蛇豕馴其素習皇靈遐邇鳴鴉懷我好  
音居然節制之司允矣干城之寄是用授爾階  
中憲大夫錫之誥命頃以遼左軍興中外震動  
惟爾肅鎮素號勝兵故徵調及焉然而虛此實  
彼黠虜能無生心益務訓練以補戎伍以戒不  
虞將授爾重柄永紓西顧欽哉

制曰人臣勤勞王事不遑啟居匪藉中閫之賢  
疇贊外攘之烈錫寵封疆而不申從貴之典勸  
于何有爾陝西按察司肅州道兵備副使李應  
魁繼室已封孺人蕭氏坤貞協德異順禔躬儆  
戒時陳滌滌夙嚴于湘金柔嘉在饋服勤靡改  
于曳綦弼我憲臣懋茲烈假瞻西陲之寧謐表  
內助之肅讎是用加封爾爲恭人翟芾游其升  
華燕私因之益惕

父母

制曰夫履坦居貞之士垂範將來而流鴻樹駿  
之英光照徃詰人推師表國藉羽儀作述相承  
所從來已念戎功而及燕翼追崇可或後與爾



寧波府志卷之四  
制誥  
贈文林郎浙江監察御史李崇先乃陝西按察  
司肅州道兵備副使應魁之父珪璋彥士孝友  
名儒趼跣迎親市義特高焚券擁臯授業調甘  
雅藉筆耕近聖人之居動循禮義折豪右之氣  
節著剛方羽翼壁經蔡仲默之功垂註疏楷模  
後進王文忠之惠協尊名惟予扞圉之臣寔爾  
趨庭之彥酒泉奏績禰廟增榮是用加贈爾爲  
中憲大夫陝西按察司肅州道兵備副使丕揚  
儒碩之幽光永佑勞臣之秩祐

制曰爲王屏翰茂騰桑扈之歌生我劬勞况切  
蓼莪之感肆頒寵渥于膚功而必隆申錫于慈  
訓教孝正以勸忠也爾贈孺人周氏乃陝西肅  
州道兵備副使李應魁之母婦順明章母儀聖  
善怡聲下氣曲承華髮之驩夕紉晨炊力贊青  
箱之業勗子教勤熊荻發祥蔚起鳳麟績最經  
營機杼之言如在恩覃綸綍杯棬之慕彌深是  
用加贈爾爲恭人煒彤管以生輝賁玄扃而永  
耀



河南布政使司右參議呂兆熊并妻誥命  
制曰藩垣任重必資分理之猷崧嶽勲崇式賦  
保釐之命矧忠貞之素篤宜寵渥之特頒爾河  
南布政使司右參議呂兆熊瑰瑋卓犖之才直  
亮端方之品保赤惠周吳地披丹聲振兵垣旣  
踐臬而踰藩洵經文而緯武偶罹權螫曾無懟  
怨之心歷試諸艱彌篤靖共之節自李曹而遷  
計署績最儲胥由水部而飭梁巡功高克詰爰  
叅右轄俾佐旬宣執法不撓藩邸屢資其匡正

省方弗倦閭閻永藉其熙怡素絲之風刑于百  
辟膏黍之誦式是中邦蓋漕輓充腴尚率齊東  
之舊勩而網繆孔固猶仍遼左之豐功物望允  
孚譽言游至茲旣晉爾光祿少卿矣仍以夙閱  
授爾階朝議大夫錫之誥命夫庖寺雖號清嚴  
而大官又稱匱乏朕不難菲飲食而示樽節爾  
何以清耗蠹而佐盈虛益宣綜理之猷光昭九  
列用迓節旄之寄寵冠羣寮欽哉  
制曰典重酬庸恩必覃于贈佩倫嚴正始寵先



空齋集卷之八  
逮于結縈用渙明綸俾紆幽惻爾河南布政使  
司右叅議呂兆熊妻封孺人魏氏夙閑姆訓作  
儷人英佐業下帷時勵鵬騫之志從官曳縞益  
敦燕婉之儀翟珈已被于花封鴛被遽捐于蘭  
綉雖閔委佗之度猶傳靜好之音是用贈爾爲  
恭人松楸揚紫綉以流輝芝檢賁黃壚而未耀

父母

制曰良士抗潛修之節澤及後昆勞臣樹藩屏  
之勲功先禰廟嘉弓表之相禪遡堂構以疏榮

爾封文林郎直隸蘇州府崑山縣知縣呂新芳  
乃河南布政使司右叅議兆熊之父處士名高  
德星應瑞孝惟承志勤施篤似乎燕山友切讓  
腴怡愛允追乎荆樹義方貞教肇開麟鳳之英  
折節爲恭雅絕輿臺之奉廉仁公慎之訓永作  
官箴恬靜簡默之風洵爲世則兵庸之膚功方  
奏薦裝之遺澤如存是用贈爾爲朝議大夫河  
南布政使司右叅議龍章渙被闡潛德于幽原  
馬鬣生輝垂休嘉于奕世



制曰天之篤豐基必先女士子之宏碩抱實藉  
母儀肆旌中岳之猷可斬北堂之寵爾封孺人  
趙氏乃河南布政使司右叅議呂兆熊之母肅  
雍自性聖善爲儀組紉孔修佐重幃之孝養泉  
絲必謹稟一德于賓莊和丸成令子之名嚴慈  
並著却鮒勵居官之節勞善不忘迨方岳之告  
成恍慈微其未泯是用贈爾爲恭人霈露蕭之  
渥澤紓風木之餘悲

湖廣布政使司分守武昌道右叅議劉觀

光并妻誥命一道

制曰朕惟荆楚推方岳之雄叅藩攸重江漢爲  
南國之紀保障尤嚴嘉績旣隆褒恩亟逮爾湖  
廣布政使司分守武昌道右叅議劉觀光峻節  
貞操宏才亮識自軒掄而歷槐市化洽環橋由  
師帥而陟版曹籌宣借箸迨僉臬憲訖聲教于  
鬼方力創苗夷奏膚功于思石爰遷楚甸俾守  
武昌而爾守勵飲冰心懷執玉綜核錢穀之數  
縷析無遺剔釐城社之奸剗除殆盡獎廉懲墨



列辟聞而嚮風宣德承流三楚霑其時雨明識  
察道傍之官柳仁恩垂蔽芾之甘棠歲閱升聞  
朕心嘉悅是用授爾階朝議大夫錫之誥命夫  
楚俗剽輕宜謹無形之釁孽南風多競務先未  
雨之綢繆欲窒隙而底瑕益飭綱而振紀庶允  
稱乎良翰行顯陟于元籓欽哉

制曰國典旌賢必疏榮于伉儷閭彞贊化式表  
譽于旬宣渙命宜申重綸用霈爾湖廣布政使  
司分守武昌道右叅議劉觀光妻已封安人黃

氏秉規女誠儷美儒修篤事庭閨操作夙追手  
桓汲力襄帷案晨昏雅切于樂機從官共守寒  
瓊甘飴苜蓿歷宦時聞解佩樂在縞綦爾夫節  
著羔絲藉爾儉功高薇省資爾勤是用加封爾  
爲恭人翟諭洵錫以升華鷄傲彌虔于夕惕

父母

制曰良臣馳驟皇途教忠有自嚴父勤勞庭訓  
翼燕無疆肆酬勤于籓垣特申恩于禰廟爾贈  
承德郎戶部河南清史司署員外郎事主事劉



定殷乃湖廣布政使司分守武昌道右叅議觀  
光之父聞矣鴻修居然豹隱節俠特由于天性  
孝友無間于人言然諾不侵排難慕魯連之誼  
取予必慎好施高樊重之風閭里薰而善良評  
先許旦家庭資其樂育業闡帟經歌鹿聲聞方  
慰箕裘之望爲龍績著猶遵堂構之謨是用加  
贈爾爲朝議大夫湖廣布政使司分守武昌道  
右叅議螭頭之雨露方新馬鬣之松楸永賁  
制曰燕喜徵歌寔人倫之至幸鸞章錫福九天

寵之特隆命緣是以有常言屢成而無斃爾封  
太安人黃氏乃湖廣布政使司分守武昌道右  
叅議劉觀光之母明章婦順令善母儀竭甘毳  
以奉尊嫜歡同儷綵耿篝燈而課誥胤教並和  
丸挫薦成名陶母之芳規允著秉筐思善敬姜  
之勞訓彌勤方高屏翰之勛式迓罔陵之祉是  
用加封爾爲太恭人副珈昭象服是宜祝尊藉  
芝函增衍

直隸徽州府知府劉可法并妻誥命



制曰新安介山而郡襟帶百城南輔一都會也  
其地雜甌駱而民豪健故稱難治有能殫心撫  
字威惠並孚以靜夷我邦者卽古良二千石勿  
尚此已爾直隸徽州府知府劉可法博學弘猷  
貞操亮識軒墀擢對蔚起華國之章留郡持籌  
懋佐度支之計爰分虎竹出守巖城而爾守勵  
酌泉絲節允先庶位政宏拔薤叢憑永杜羣胥  
秉法虛公闢山藪之利而勿克如神發摘殄窮  
奇之孽而非苛惠必究于憚發歌宣禱禱化式

孚于譽髦誦洽薪樵棠陰初被于茸城黍澤益  
深于歙郡是用授爾階中憲大夫錫之誥命夫  
移風易俗非法嚴令具所能爲也道在身先之  
而已以爾潔廉正直動質神明庶幾不令而從  
矣益崇化道以樹風猷其于振肅激揚有餘地  
也欽哉訓辭朕命不易

制曰守土之吏上宣主德下求民莫夙夜匪懈  
以宏此駿烈也則必有肅庭屏以勸內政者而  
在公之節不分贊冊所必隆已爾直隸徽州府



知府劉可法繼室封安人汪氏在饋無儀嗣徽  
有則鳴機軋軋匡素業于囊螢宿編垂垂贊清  
標于車鹿肆嘉功于郡牧徵敬助于閭儀是用  
加封爾爲恭人尚佐班春之惠益履視夜之規  
父母

制曰篤學姤修之士遇阨弓旌而行誼世其家  
儒術成其子流鴻民社光耀構堂詒穀之效大  
彰明已禰廟疏榮熙朝彝典爾生員贈承德郎  
南京戶部貴州清吏司主事劉子奇乃直隸徽

州府知府可法之父奎璧雄文瑾瑜粹品孝隆  
養志孺慕勿替于終身友篤因心師事彌嚴于  
垂老雌黃不關其口居然醇謹之風橫逆不蒂  
于懷允矣冲夷之度一經教著義方蔚起循良  
五馬功高清白式光懿訓是用加贈爾爲中憲  
大夫直隸徽州府知府闡潛光于冥漠流景耀  
于春秋

制曰郡大夫擁專城披金紫不幸祿不及父猶  
有母在庶藉五鼎之養以申罔極之情也而鞠



我者又已往矣可無卹典以慰孝思爾封太安人陳氏乃直隸徽州府知府劉可法之母性惠而溫寶慈與儉桃蕢表譽夙聞孝敬之聲荻畫矢規懋起賢良之胤考堂就養時秉績以訓廉珈副承恩猶曳綦而勿厭雲間之板輿方御萱背之菴澤遂捐是用贈爾爲恭人彤管煒矣生輝玄扃燁焉增耀

直隸安慶府知府楊堯華并妻誥命一道制曰朕惟郡守表帥庶邑統理十同至重任也

矧皖城濱江界淮志稱人躁競而氣果決故號難理有能悉慮救寧揉此一方者何吝璽書褒異之爾直隸安慶府知府楊堯華廉貞自矢介直秉操擢穎軒廷持籌版部出納惟允望實並孚爰剖箚符踐更巖郡而爾政崇大體守勵素絲甘雨隨車麥吐漁陽之穗仁風偃草民安渤海之繩袴襦徧洽于閭閻輸將恐後儲侍特充于戎伍庚癸無虞居然畿輔藩垣卓矣江淮保障是用授爾階中憲大夫錫之誥命頃以遼事



寧海齋全集  
卷之二  
三  
孔亟徵調繹騷議者以留都空虛爲慮夫審固爾郡未雨綢繆共宣防禦匪異人任也益勤遠畧靖夷我邦顯陟且游至矣欽哉

勅曰賢牧守撫摩吾民俾家室無化離之歎而內視結縢之配音容已杳珈飾弗膺朝廷必體其情而申卹焉以示報也爾直隸安慶府知府楊堯華妻贈安人李氏稟規姆訓儷德儒修在饋無儀穆著璫觴之度宜家有則夙聞琴瑟之聲大業允佐乎青箱遽捐樂杼駿烈方騰于皂蓋久謝桓車是用加贈爾爲恭人載承紫誥之榮永作玄扃之耀

父母

制曰良吏究宣德意善俗宜民朕故不憚寵嘉以逮若父而况其父固嘗有功于造士者渙被新恩亦彰舊勩爾原任河南開封府襄城縣儒學訓導贈承德郎戶部福建清吏司主事楊用賓乃直隸安慶府知府堯華之父通德名儒明經彥士懷忠體孝冠冕夙擅于士林端範綏猷



檇樸特宏于師席評高許旦猶傳首藉清風教  
著常經茂起箕裘駿業三鱣應兆五馬增輝是  
用加贈爾爲中憲大夫直隸安慶府知府學歲  
九庫乃及子而克售秩比雙轡實自身而食報  
制曰朝廷因子貴母正嫡必先用昭齊體之尊  
式表垂穆之澤恩與時而罔極命緣是以有常  
爾贈安人郭氏乃直隸安慶府知府楊堯華之  
嫡母坤貞毓德異順禔躬佐餽謹晨昏之儀逮  
下溥衾禍之惠躬緝纏而襄絳帳頌協女師理  
機杼以課篝燈名成良史悵隼輿之弗逮遡鳩  
餉以疏榮是用加贈爾爲恭人霈渥澤以如新  
慰永思于弗替

直隸松江府知府張光縉并妻誥命一道  
制曰雲間枕江負海而郡東南一大屏也重以  
田賦之不均供億之日困守茲土者非誠心撫  
字兼有幹濟之才未易勝厥任矣爾直隸松江  
府知府張光縉峻潔平標澄泓識慮楓宸擢穎  
版部宣猷洵歷虞衡載分虎竹而能飲冰自矢



寶海齋全集  
卷之四  
制  
裁牘無留剔蠹鋤強法不撓于豪右省刑清獄  
惠必及于孤惲萑苻絕桴鼓之鳴波恬溟渤闌  
闐洽袴襦之利誦沸薪爇廬江之桑壘方新峰  
泖之棠陰載芾茲授爾階中憲大夫錫之誥命  
日者島夷不靖沿海郡邑不無窺伺之虞今且  
江洋奸宄所在而是益宏保障以慎固吾圉匪  
異人任也爾其懋哉行有顯陟

制曰朕嘉與二千石共此民也誰與守共此家  
乎守爲民以忘家朕爲民以旌守則裊助可無  
褒與爾直隸松江府知府張光縉繼室楊氏直  
訓無違嗣徽有則鞠子溥鳴桑之愛宇下有恩  
居身崇椎布之風從官以儉爾夫處脂不潤猶  
塵簋簋之規在劇能調尚切弋言之儆嘉齊聲  
于召杜稱並美于郝鍾是用封爾爲恭人被象  
服以升華儆燕私而益惕

父母

制曰夫庭訓一試而效則其徼國恩亦一命止  
爾若乃一鄉敬愛之遺久而益著百城畏懷之



化遠而彌彰則重綸申錫可或恡乎爾儒官封  
承德郎戶部貴州清吏司主事張思烈乃直隸  
松江府知府光緡之父天子端方行敦長厚析  
產隆薛包之誼友切因心好施高樊重之名惠  
周同里惟留餘于性地每種德于情田輩起英  
賢勿替嚴師之訓榮膺茵鼎猶然寒士之風杖  
履已重于賓筵德義允孚于評旦功程熊隼慶  
洽弓裘是用贈爾爲中憲大夫直隸松江府知  
府再賁如綸之寵永垂封斧之輝

制曰人子欲報母慈惟養與名爾然養僅及身  
而令名長世則顯親之名乃倍于養此孝子所  
爲力砥于官方而希榮于國典也爾封安人部  
氏乃直隸松江府知府張光緡之母尹吉秉規  
孟歐遺範桃蕢宜室克襄共爨之風荻畫成賢  
蔚起齊名之彥貴而能儉樂勿改于縞綦老而  
彌勤思不踰于筐績機杼之言猶在枵棬之澤  
如存是用贈爾爲恭人需渥澤于露蕭慰永思  
于風水



原任山西潞安府知府陳儒并妻誥命

制曰朕惟上黨居天下之脊當河朔之喉鎖鑰重地莫此爲要非得良二千石撫綏而訓定之未易旌席吾民而保障茲土也爾原任山西潞安府知府陳儒風規凝遠志節方廉大廷擢華國之章望邑溥宜民之治節屢更而彌勁才久歷而益宏爰自刑曹出分符竹建安霖雨方繫望于甘棠昭義袴襦載程功于畫鹿政平訟理閭閻無愁嘆之聲吏畏民懷城社絕叢憑之隙

師帥風清絲絨綏和化洽菁莪勞績允彰譽言日著茲旣晉爾山西按察司副使矣仍以歲閏授爾階中憲大夫錫之誥命夫觀察視郡守分綦尊轄綦廣矣而表素節以風庶僚豫綢繆以貞百度猶然行刺史事也爾業已剛直夙秉茹吐兩捐固已治優十郡矣舉而措之何難振勵風猷肅宣綱紀務率成勞式弘遠畧將全晉寔有嘉賴欽哉

制曰夫婦有齊體之義故朝廷有從爵之章若



乃歷勳盤錯永佐廉操而中道棄捐尤足閔也  
錫祉黃堂揚徽紫誥分固應爾爾原任山西潞  
安府知府陳儒妻累封安人羅氏圖史遵箴蘋  
繁協度孝隆華髮夙閑佐餒之儀業勵青箱雅  
著操機之範瞻星視夜助驥足于題輿聽鑰整  
珂翼豸冠于參幕乃熊軾之豐功方奏而鴛帷  
之敬助遂遐是用贈爾爲恭人服愍綸于冥漠  
昭懿德于休嘉

父母

制曰立愛惟親茂顯揚而成孝靡瞻匪父懷明  
發以作忠晷惟治郡之猷夙本趨庭之訓淵源  
有自寵錫攸宜爾累贈承德郎都察院經歷司  
經歷陳樾乃原任山西潞安府知府儒之父馳  
騫德途翱翔藝圃學嗜義經之旨幹蠱宣勞行  
高鹿隱之風勤施市義名不出其里望重式廬  
善允積于陰業宏裕後露冕功高虎竹燕詒澤  
著椿庭是用加贈爾爲中憲大夫山西潞安府  
知府洵承綸綍之華永作松楸之耀



制曰臣子享朱幡皂蓋之榮而念畫荻縫衣之澤陳牲則痛列鼎則悲此至情也課績疏恩視初命更有進已爾累封太安人梁氏乃原任山西潞安府知府陳儒之母性鍾吳順節勵恒貞躬操作以克家不辭盡瘁茹辛酸而矢訓蔚起嗣賢曳綦勿厭于從官齧檠每懷乎同穴老而猶績時厯勞善之規沒而允寧尚著肅雝之範是用贈爾爲恭人彤管生輝黃壚永賁

直隸長州府同知萬建侯誥命

制曰朕惟晉陵地饒水深爲東南澤國然以帶湖枕海嘯聚不常特置郡丞專屬防守非得長才異能之士未易投艱而任鉅也爾直隸常州府同知萬建侯珪璋偉抱黼藻闕猷擢秀棘闈綰符花縣隨以令譽晉貳名邦而爾一意奉公精心營職禱雨速甘霖之應蝗魃潛消戢奸除鳴義之雄鯨鯢盡掃五封奠于安堵三年沐其恩膏茲特授爾階奉政大夫錫之誥命方今島夷情形可詫邊警時聞惟恃守丞協謀杜彙若



爾防江著績洵能捍禦一方矣尚展訐謨益宏保障將明試爾功嗣有顯陟欽哉

直隸淮安府分管河務同知魯佶誥命

制曰朕惟楚州爲漕運咽喉舳舻啣尾而進而黃流叵測時或梗焉故特設丞以司董督其勞勩非他司馬等也爾直隸淮安府分管邳宿河務同知魯佶系出大儒才堪倚任棘圖擢秀巖邑蜚聲晉貳淮陰爰綜水道而爾勤同運甃操比懸魚睢水清寧不改中牟異澤羽淵順治永

恬東海澄波奏聞四瀆之安瀾功溥千艘之利涉茲因歲閱特授爾階奉政大夫錫之誥命禹諭平成記稱源委蓋河多伏流水土之平不易非可盡委之海也其間小則入大則過均則會惟是隄防蓄洩相度機宜而設誠布之此萬世之利矣汝其毋忽細流毋釀大浸益懋成勞以需顯陟欽哉

福建福州府海防同知陳豸誥命

制曰朕惟閩郡吻海派江爲東南一都會而與



島夷共此潮汐之利出沒時有備禦爲嚴故特  
簡丞貳俾司防海之任至專且重也爾福建福  
州府海防同知陳豸才猷敏達操履清貞拔俊  
鄉闈作人膠序已蜚聲于粵邑茲贊政于閩邦  
而爾守勵檠冰慮先桑土扼貂璫之跋扈冒險  
不辭遏溟渤之橫流履危弗避抵瑕窒隙四郊  
享寧謐之休布德施仁百邑藉帡幪之慶茲以  
歲闋授爾階奉政大夫錫之誥命夫閩中民稠  
地狹徃徃倚海爲生亦其勢然也乃或扞罔交  
通以生戎心則已事可鑿矣惟是稽出入覈徃  
返使小民不失負海之利而時時譏察非常以  
防釁隙豈異人任其慎愆母徃益宏保障朕將  
顯陟爾

河南衛輝府同知魯廷彥誥命

制曰夫衛州古韓魏之郊背太行臨黃河接上  
黨居然鎖鑰地也惟是戎務繁重綏戢爲難非  
得廉明精幹之吏何由佐二千石而稱保障爾  
河南衛輝府同知魯廷彥珪璋粹品經濟宏才



爰籍鄉書出貳巖郡而爾燃犀朗照茹藥貞操  
圍牧具修垆野盡超群之選戎兵克詰墉垣多  
徹土之謀攝符萬戶膏流佐郡十同績奏茲授  
爾階奉政大夫錫之誥命昔有盤錯見奇而稱  
神明者非爾所泣土耶其要在寬假轡策勿令  
有所拘閔而已爾業蒞司馬將銷萌固圉繫爾  
是任尚益勵前猷以圖後效傳循良者詎獨在  
漢也欽哉

陝西西安府同知伍維新誥命

制曰朕惟西安爲關中隩區邊儲軍政號稱繁  
劇非廉明敏練之才弗克分理旣臻厥成宜加  
渙渥爾陝西西安府同知伍維新英標朗識介  
節通才蚤騰駿譽于鄉書兩著祥刑于南服爰  
從特望晉副專城而爾益謹操修彌弘幹濟慮  
周防弭沙塵嘯聚不萌籌炳灌輸壁壘儲胥常  
裕塞垣衽席將士就型茲所司以最績聞是用  
授爾階奉政大夫錫之誥命夫金城天府之國  
時以西羗蠢動爲虞所賴戢寧在守貳任之曩



爾報成前理朕已勗爾後績矣尚殫厥爲終副  
惠保至意則惟汝庸欽哉

直隸大名府管宣府西路倉場通判孔聞  
定勅命

勅曰朕惟魏郡股肱地鎖鑰重寄倅與守共之  
矧上黨邊儲每虞不繼而歲歉相仍岌岌憂庚  
癸未得廉幹之吏孰副若任而底乃績爾直隸  
大名府管宣府西路倉場通判孔聞定品爲國  
器學有家承弓冶聖真闡遺經而應辟羨墻道

脉任半刺以分猷箸籌倘倉廩芻牧之需軍民  
咸藉出納嚴登耗盈虧之數駟僮潛消岸憤功  
高題輿望著茲特授爾階承德郎錫之勅命夫  
足食足兵必先民信非爾聖祖懿訓乎爾業已  
理餉有成使士鼓超距馬樂騰槽矣尚益輸誠  
信以永孚此土也不忘先訓朕豈忘汝庸欽哉

河南衛輝府通判宋登仕勅命

勅曰朕惟別駕爲郡股肱得與二千石叅校政  
事任至重也乃有兩刺巖郡而並展驥足者璽



書褒美尤宜亟已爾河南南衛輝府通判宋登仕  
器格端凝識猷敏練黌宮升雋望郡分猷而能  
潔已愛民實心任事才長籌畫儲侍豫桑土之  
防操比羔絲搜剔清鼠狐之穴晉陵之口碑方  
洽汲郡之嘯咏再傳望著六雄名高千里茲授  
爾階承德郎錫之勅命昔人有放情吏隱者謂  
惟州司馬可從容山水詩酒間此非確論也夫  
開倉賑饑不稅農器酌水明廉表表前史者獨  
非別乘事耶爾業有惠政其益勵毋倦朕且以  
公輔器之矣欽哉

雲南楚雄府通判任世奇勅命

勅曰朕軫念遐方注簡郡倅當陞辭之日德意  
俱遠有能仰副朕懷俾威楚河山安于衽席萬  
里雖遙猶置尺階爾雲南楚雄府通判任世奇  
乃原任山西平陽府知府甲第之子詩禮醇儒  
治平賢胤明經選雋監郡叅猷而爾杼夙抱以  
匡時本家傳以爲政五純勵節三事勤心操敬  
慎而服官凜躬若免殫仁明而視篆愛民如傷



寧濟齋全集  
卷之四  
四十五  
居然惠浹一方莞爾歌騰百室績成半刺望重  
全才茲特授爾階承德郎錫之勅命爾父歷中  
駁外卓有令名而翻然家食未究厥施爾能克  
砥官方豈惟無忝厥職庶幾幹蠱用譽矣益勵  
初心用需峻擢欽哉

直隸順德府推官洪敷教勅命

勅曰士起經術而司刑名厥惟艱已矧畿輔重  
地奸憑城社則三尺易撓事係浩繁則六條難  
察非秉公持明敬忌日勤者何由勝若任而副  
明命也爾直隸順德府推官洪敷教才猷英敏  
蘊藉宏深擢自廷掄試于郡理冰操特勵金矢  
體其直剛霜鏡無私肺嘉歸于稽簡庭絕舞文  
之吏民無滯獄之寃要倫允佐黃堂廉察雅資  
繡斧程書來奏朕是用嘉茲授爾文林郎錫之  
勅命夫直朝以正直忠厚爲本非明明棗常者  
不及此爾業已恩威並訖茹吐兩捐卽由以職  
糾繩飭風紀可也益弘志節無棄爾勞以光訓  
辭欽哉



浙江嘉興府推官段鏞勅命

勅曰朕軫念民命慎獄敬刑故于列郡司理之臣必妙簡而優叙之誠重厥職也矧浙爲雄藩而樵李屬在西鄙稱繁劇不易理者乎爾浙江嘉興府推官段鏞識度粹夷風規峻朗入承軒對文成華國之章出佐邦刑政習傳家之譜祝網弘開三面卅管生春餐水不染一塵清心映物奸是用戢民以不寃茲特授爾階文林郎錫之勅命夫李官采風覈吏振紀察廉亦猶行直指事也惟是休畏弗徇茹吐兩捐覘所建豎矣爾業已廉平不阿卓然有聲尚益懋遠猷庶永終譽以無棄朕顯庸之命

浙江紹興府推官周家椿勅命

勅曰朕惟郡國化理要在刑清民服特選司理俾耑讞決至重任也矧甬東于越並號繁劇訟獄滋多非藉廉平曷稱明允爾浙江紹興府推官周家椿操如水玉品若鳳麟一冠廷掄兩司邦憲而爾宅心慈愛泣事精勤審克協中庭無



寧濟齋全集  
終訟得情畏志人願資成署篆風清允佐黃堂  
之正直題材鑑徹雅資繡斧之察廉績最三年  
名優十郡是用授爾階文林郎錫之勅命國家  
慎擇臺省多徵理官謂執法不阿持衡有度直  
節嘉猷所素勵也爾業宏此道稱朕意已益念  
棊常無忘敬忌朕且有後命欽哉

江西吉安府推官沈應時勅命

勅曰國家設司理以慎庶獄惟此良人是求是  
迪而吉州民俗險徼讞決惟艱有能廉平不苛  
得情畏志賦茲明命豈忘褒嘉爾江西吉安府  
推官沈應時貞操粹品朗識通才擢對大庭司  
刑望郡而爾守絕一塵法虔三尺簡稽協倫要  
之極平亭造輕重之宜致愛悉聰大吏雅資其  
詳練灑寃釋滯細民咸戴其清和嘉肺春溫布  
天朝弘貸之德風裁秋肅飭庶僚綱紀之猷茲  
以歲閱授爾階文林郎錫之勅命夫吏患不廉  
平爾苟能廉平則推此立朝正直忠厚于是乎  
在故朕遊臺省必徵理官爾尚益念棊彞無忘



敬忌朕且有後命

福建汀州府推官馬中駮勅命

勅曰有虞之世鰥寡無告皇帝猶清問焉而降  
典折刑伯夷是藉朕寔有嘉師願與郡國司理  
共茲平明之化非藉得情畏志者胡由稱朕德  
意以副明命爾福建汀州府推官馬中駮丰裁  
凝峻器識澄泓擢對大廷司刑壯郡而爾守絕  
一塵才堅百鍊藹煦惠流益覆精嚴智破藤緘  
折獄惟平庭皎滿輪秋月攝符不擾人歌有脚

陽春簡孚茂佐乎黃堂廉察允資乎繡斧茲以  
歲閱授爾階文林郎錫之勅命夫以禮齊民譬  
御之有轡刑則其鞭也執轡于此而動鞭于彼  
乃稱良御爾業以明刑著矣倘亦有坊民于未  
然而執轡如組者乎尚益與爾長懋明之朕且  
顯陟汝

湖廣長沙府推官甯繩武勅命

勅曰朕惟司理入贊郡守以清庶獄出佐廉察  
以振風猷厥惟重已矧茲湖湘鉅鎮訟誦殷積



彈壓尤嚴非得明允廉平之士未易任也爾湖  
廣長沙府推官甯繩武操持峻潔才識茂明起  
自掄軒試于郡憲而爾飲水砥節懸鏡燭奸致  
愛悉聰條議擅興除之利虛中察麗平亭甦積  
滯之寃金矢體其直剛繡斧資其揚激聲騰薦  
剡績在程書是用授爾階文林郎錫之勅命語  
不云乎刑禁已發禮防未然志稱星沙士多廉  
隅民尚忠義其俗固可馴而理也端務德讓以  
風之益敦節槩以維之將刑清訟簡達于全楚  
朕不忘顯陟汝欽哉

河南開封府推官唐暉勅命

勅曰朕念郡國庶獄不辜每慎選廉平之彥俾  
宏明弼厥任維艱乃有兩司劇理洵著祥刑不  
難壘書褒美之矣爾河南開封府推官唐暉志  
凜清霜心如皎日簡自軒對載試郡刑而爾益  
砥廉勤彌深矜恤本經術以飾律滯牘無留借  
法比以行仁覆盆畢照戢憑叢之積孽頌洽窮  
簷清權務之漏卮費饒公帑黃堂資其詳要繡



寧海齋全集 卷之二 制誥 五  
斧藉以察廉茲以歲閱授爾階文林郎錫之勅  
命夫司理覈吏採風居然行直指事矣惟是勿  
畏勿休不茹不吐立朝風猷具于斯在爾業已  
克舉若職尚益殫乃心共乃位以無廢朕之休  
命

山東兗州府推官呂維祺勅命

勅曰朕念東魯禮義之鄉而民迫薦瘥寧爲荼  
毒惟是廸求良人俾司郡理將欽恤是寄爾爾  
山東兗州府推官呂維祺清標映世朗鑑懸空

擢對英年祥刑劇郡而爾操嚴一介敬聽五辭  
先拊循而後讞決澤及枯齒酌輕重以慎平反  
寃消嘉肺有倫有要簡孚茂佐乎黃堂不縱不  
畏廉察允資乎繡斧可謂祇厥敘已是用授爾  
階文林郎錫之勅命夫齊禮且格得情弗喜爾  
奉教于聖賢有日矣值今流離甫定享有寧宇  
正與爾長惇禮教厲廉耻之時也禁于已然固  
惟爾之恤坊于未然亦惟爾之休庶永終譽以  
需後命



廣東潮州府推官沈祖述勅命

勅曰一郡之讞統于司理任至重也矧潮陽介在海隅當閩南兩越之交鷓義屢聞覆盆時有非藉明允之士曷副欽恤之命爾廣東潮州府推官沈祖述志行端純才猷敏練棘闈擢穎槐市橫經選自師儒俾司郡憲而爾宅心仁恕律已廉勤致愛悉聰察麗協平中之慶飲冰茹檠攝符流愷悌之聲惠威允佐黃堂廉察雅資繡斧是用授爾階文林郎錫之勅命志稱潮士篤于文行號海濱鄒魯乃今囂陵競起至有青衿而甘扞網朕甚軫焉夫刑禁已然禮防未然爾業已整齊有法抑亦崇務德化以隆禮讓之治乎朕不忘顯陟汝

直隸河間府滄州知州李騰蛟誥命

制曰朕覽稽漢史有治渤海而以廉能著者慨然慕之吏能踵其芳躅惠此一方何難壘書褒美以示風勵爾直隸河間府滄州知州李騰蛟峻潔操持慎詳識慮掄英棘院剖竹方州而爾



清如飲水治倣解繩剔釐消城社之奸勸課洽  
桑麻之利值災沴之薦至用政爲年清嘉肺之  
沉寃得情弗喜商賈快藏市之願譽髦擴登俊  
之途計最六廉績程三載是用授爾階奉直大  
夫錫之誥命夫滄當運道之衝舳艫啣尾而至  
長吏者僕僕謹迎送慮非譽亂其中自非秉正  
持廉者烏能弗渝所守爾業有成勞尚慎終無  
倦以副明命朕能尊顯之如漢故事欽哉

直隸真定府趙州知州王佐才誥命

制曰朕惟州刺史承郡率邑以子民至重任也  
若乃賢聲旣著于屬城循績復高于州治其于  
惠此一方卽衽席弗啻已增秩賜璽豈有靳焉  
爾直隸真定府趙州知州王佐才貞操雅度卓  
識宏猷始以歌鹿之英縮符臨邑隨以烹鮮之  
績分虎方州而爾志切捧盈才如導窾駕輕就  
熟風清積案之塵剔蠹釐奸庭絕憑叢之隙房  
子之棠陰孔邇慶源之袴襦載歌露冕功新懸  
魚節舊是用授爾階奉直大夫錫之誥命漢臣



有築望臺望其君者非爾州產耶官斯土者存  
是心以率職何職弗修爾益凜天威不懈乎位  
朝廷于趙直尺階也行且峻擢汝欽哉

直隸保定府易州知州程玉潤誥命

制曰方州重任而畿輔諸地號稱股肱郡雖朝  
施暮暨猶賴賢長吏奉宣德意而致之民自非  
通才曷克濟已爾直隸保定府易州知州程玉  
潤宏才粹品雅範冲襟奉對明庭筮仕州牧而  
爾清嚴獨運敏練兼長寓撫字于催科桑麻遍  
野以牧芻爲保障驎駟超群嵯法疏通商賈動  
歸市之願軍儲宿飽卒伍無脫巾之呼福星聚  
于一方惠澤成于三載茲授爾階奉直大夫錫  
之誥命詩不云乎夙夜匪懈虔共爾位此上臣  
之極軌也其或始淬勵而終倦勤朕奚取焉尚  
矢心匪懈益著虔共以竟爾成將選諸所表不  
次用之欽哉

直隸揚州府泰州知州崔國裕誥命

制曰州刺史居郡邑之間尊親並寄而海陵枕



江臂淮屏蔽陪京政繁役重號稱難治能舉斯  
職朕甚嘉焉爾直隸揚州府泰州知州崔國裕  
孝廉粹品經濟宏摹振鐸擴興道之薪槲製錦  
樹媯川之棠蔭爰從最績晉陟方州而爾以駕  
輕就熟之才勵執玉捧盈之守案無留牘室有  
懸魚惠溥春溫被野之桑麻沃若威行霜肅憑  
叢之豐孽潛消循成賦以善催徵挽輸恐後酌  
用緩以甦災困饑瘠無聞化洽三刀名高五馬  
茲授爾階奉直大夫錫之誥命頃者奉簡書而  
巡南國者非爾子耶其激揚振刷當于朕心  
攷爾政吏肅民安實開弓冶教家治國並著偉  
型賜壘增秩不虛爾尚勵成勞無廢朕命將于  
爾觀世臣焉欽哉

直隸廬州府無爲州知州陳鳴熙誥命

制曰州刺史承郡率邑實兼尊親之任矧金斗  
吾股肱地而無爲屬焉重以歲之不易民亦勞  
止非廉明愷弟之長何由膏雨茲土而祗厥敘  
爾直隸廬州府無爲州知州陳鳴熙志存方介



才具茂明脫穎閩闈宣猷江邑爰重方州之寄  
載膺剖竹之司守不濯而自清識周遭而彌練  
緣經術以敷實政本惠愛以需膏流振刷消窟  
穴之奸塵清案牘撫字息哀嗷之衆露潤桑麻  
西原之棠蔭方深南土之絃歌載振茲以歲閱  
授爾階奉直大夫錫之誥命頃者已晉爾爲雷  
陽佐矣雷俗地濱炎海州雜黎俗視廬江更號  
難理要以廉靜悃幅固不易民而化也爾旣才  
守有聞惠威並著尚以治廬者治雷欽哉

原任山東兗州府沂州知州王萬祺誥命  
制曰朕惟州刺史承郡率邑以康又元元職至  
重也矧吳之太倉魯之臨沂俱號稱衝劇而重  
以災沴之頻仍有能惠流兩地澤遍鄰封者褒  
崇可弗亟與爾原任山東兗州府沂州知州王  
萬祺英標朗識介節通才上國象賢要津是令  
蚤揚茂績兩縮州符而爾篤慎水操克弘幹濟  
節煩苛以示休息室有袴襦勤賑恤以拯流離  
澤歸鴻鴈膏雨均施乎南北醇風漸被于士民



婁江之崇蔭旣深瑯琊之壤歌益振茲已晉爾  
同知淮安府仍以歲閱授爾階奉直大夫錫之  
誥命夫爾父不嘗以刺史有聲秦隴間耶爾業  
已才守並茂庶紹厥序矣乃日者東土熒黎倚  
淮爲外府故兩地實相表裏爾尚以勞心臨沂  
者保障淮海將東民視爾猶衽席也欽哉無倦  
山西大同府朔州知州柳白卿誥命  
制曰朕惟朔州爲代鴈門也逼近關隘最稱險  
要故寬則保境安民急則捍城守禦非文武兼

才未易守斯土而祇厥敘也爾山西大同府朔  
州知州柳白卿志操峻潔識慮精明擢穎棘闡  
橫經槐市爰遷壯邑已聞製錦之聲載晉方州  
益勵懸魚之節黜繭絲而勤撫字澤遍桑麻蠶  
蠹孽而酌興除風清城社詡噐別于盤錯沙塵  
嘯聚無驚垣斧試之體髀邊鄙烽煙不聳名聞  
薦牘績在程書是用授爾階奉直大夫錫之誥  
命方今黠虜欵關邊庭臥鼓民狎于野庶幾乂  
安而儲胥不繼徵調煩興未雨徹土先濡戒初



寧海齋全集  
爾宜籌之熟矣益固爾猷務宏遠畧以稱朕安  
攘之意欽哉

廣西桂林府永寧州知州劉兆桂誥命

制曰朕惟八桂去京師七千里而遙聲教易阻  
而永寧屬大軍剿除之後州城新設猺獞雜居  
尤稱難治誠得賢刺史輯寧而馴擾之其於褒  
嘉至亟也爾廣西桂林府永寧州知州劉兆桂  
堅凝雅度剴割宏謨升俊楓廷宣猷黔邑採自  
薦剡晉陟方州而以駕輕就熟之才運批郤導

窾之技利器別于盤錯跋扈潛消轍迹遍于閭  
閻膏濡溥被買犢風追渤海飛鴉音集洋林績  
最三刀聲馳五嶺是用授爾階奉直大夫錫之  
誥命頃黔苗不靖遠邇繹騷未雨綢繆慎固吾  
圉爾守土事也矧躬擐介冑用作干城有思印  
之遺烈在焉益勵爾猷永爲保障朕且有後命  
欽哉

廣西南寧府新寧州知州劉銓誥命

制曰州刺史號親民而越在封疆去神京數千



寧波府志卷之五  
里望澤難霑非得廉明仁愛之士胡由膏雨茲  
土而衽席吾民也爾廣西南寧府新寧州知州  
劉銓朗識貞操宏猷亮節蚤魁賢籍出綰州符  
而爾能守凜四知政兼六察殫精裕下聿興襦  
袴之謠蒿日憂邊式豫綢繆之策案牘澄清若  
水郊圻溫煦如春露冕功高夾轅瑞著茲以歲  
閱授爾階奉直大夫錫之誥命夫新寧古百粵  
地也控扼交趾而海徼溪峒皆其接壤漢化雖  
覃夷風未息不有長馭曷克靖綏爾尚茲志初

猷永圖後效卽萬里外若尺階朕不忘顯陟汝  
雲南大理府鄧州知州戴應豸誥命  
制曰夫牧與令等親民官也民歌父母壘書輒  
寵異之矧踐更茲土勲猷疊著而巽命不申勸  
予何有爾雲南大理府鄧州知州戴應豸冠玉  
英標發劓利鏑棘闡奮跡槐市橫經再試花封  
晉司州篆而爾才經百鍊守潔四知轟雷掣電  
之才狐狸屏跡化日和風之澤鴻鴈歸心噐堪  
任大恢乎游刃有餘智足剗煩綽矣迎機立解



四郊輿誦三載政成茲授爾階奉直大夫錫之  
誥命爾昔令華竹宰博平業已牛刀奏績茲俾  
葉榆之地復成樂土所稱明習吏治舍爾其誰  
尚益圖後効以永綏我南國也邊陲重寄將惟  
爾是賴欽哉

直隸順天府通州寶坻縣知縣王則古勅  
命

勅曰朕惟善治不易民而化真才每擇地而效  
乃有兩居疲邑而奏畫一之理古良吏弗過已

爾順天府通州寶坻縣知縣王則古器度恬夷  
風規峻潔殿庭專對畿邑載司而爾止水存心  
烹鮮爲理案無留牘庭絕憑叢調適孔道之衝  
由廉生節拮据薦饑之歲用政爲年易城之畏  
壘方新盈州之甘棠益茂茲以歲閱授爾階文  
林郎錫之勅命夫坻邑密邇神京賦多繫籍役  
易影射小民實受其病所從來漸矣爾業已惠  
究單悖法行豪右非廉明素孚不及此益勵成  
勞庶永終譽輦轂之下召命且首被焉欽哉



直隸真定府趙州寧晉縣知縣侯應琛勅  
勅曰朕軫念民瘼慎選邑令將拊循是賴矧寧  
昌當趙晉齊魯之衝值災沴頻仍之後非得至  
誠仁愛撫綏不倦者胡由稱朕德意副茲明命  
爾直隸真定府趙州寧晉縣知縣侯應琛乃原  
任山西巡撫都察院右副都御史于趙之子學  
稟家承才宏世濟首魁鄉籍步武軒掄爰握耑  
符出司畿邑而爾愷悌存心精明爲理纖塵不  
染居然粹白家風宿蠹潛消卓矣廓清餘烈賑  
災恤患澤中鴻鴈來歸弭盜安民野外萑苻絕  
警魯仲康之治成三異王元之之日賦五題教  
化隨德澤俱長政事與文章並美茲以歲閱授  
爾階文林郎錫之勅命夫爾父起家郡理洊陟  
中丞惟是靖共匪懈正直是與以致是爾業以  
循良著亦猶行父之道也尚益殫宏猷以永終  
譽顯世之命朕豈有靳焉欽哉

直隸順德府邢臺縣知縣王大受勅命



勅曰朕嘉惠元元思宏輯寧之治蓋每飯未嘗  
忘賢令長也矧畿輔壯邑保障尤嚴有能拊循  
不倦以永綏吾民者能無褒叙以示風勵爾直  
隸順德府邢臺縣知縣王大受丰骨峻潔才慮  
精明始以制科之英剖符鉅鹿繼以剗劇之望  
更踐邢臺而爾操勵冰霜澤宏膏雨值災沴之  
後政足代年當糾紛之衝案無留牘閭閻之輸  
輓恐後軍伍之儲侍特充績最烹鮮芻棠陰于  
兩地風清齋馬堅檠節于三年茲授爾階文林  
郎錫之勅命夫邑吏之事與六卿相表裏饒爲  
邑而六察無不備卽以司封駁飭憲度可也益  
勵成勞以需顯陟欽哉

直隸廣平府成安縣知縣賈三策勅命

勅曰武安股肱郡土廣俗雜號稱難治而成邑  
爲最有能悃幅無華拊循不倦以弘休養之績  
亟下璽書褒美之已爾直隸廣平府成安縣知  
縣賈三策清方端品瑰瑋宏才擢對殿廷踐更  
畿邑而爾心懷御朽志切凜冰寓撫字于催科



桑麻遍野運仁慈于釐剔蠹孽潛踪曲梁之棠  
蒂方深乾侯之雷驩載著是用授爾階文林郎  
錫之勅命志稱廣平尚儉約勤稼穡故風俗最  
爲醇美乃一遇災侵輒稱周察寧獨歲爲政母  
亦有司傳舍其官而澤不終究也爾業已才守  
並著惠此一方民矣抑亦永殫厥心以救寧于  
茲土朕何難顯擢汝

直隸大名府魏縣知縣區龍禎勅命

勅曰夫善爲令者非以令治民以民治民也是

故因俗化導而隨地可以見功非廉明諳練之  
士不及此旣累成勞宜彰褒異爾直隸大名府  
魏縣知縣區龍禎端醇貞度敏練長才擢儁南  
宮分岩兩邑而爾凜操修于獨寢如履春水流  
閩澤于窮簷共懽冬日興除有漸廢墜舉而蠹  
猾潛踪茹吐兩捐豪強屏而善良安堵閩漳之  
棠陰方茂洹水之絃誦聿新績最三年廉如一  
日茲授爾階徵仕郎錫之勅命頃者旱蝗相仍  
畿南爲甚朕憫然憂之爾業已拯恤勞來政足



代年矣惟是菑則修政豐則修備益勵成勞以  
永綏此樂土也朕不忘顯陟汝欽哉

直隸徽州府休寧縣知縣張汝懋勅命

勅曰朕念海陽爲新都巖邑而俗競繁夸民輕  
本業故疲瘵頻仍囂陵時有非得廉明愷悌之  
吏何以廣宣德意賦茲明命爾直隸徽州府休  
寧縣知縣張汝懋乃原任左春坊左諭德進階  
奉直大夫元怵之子學問淵源丰標峻潔軒掄  
步武壯邑司符而爾操勵凜冰才同游刃撫字

惟勤而賦自集興除有漸而民不勞崇雅黜浮  
條告悉根經術發奸摘伏質成具服神明泮宮  
生芹藻之香四境洽桑麻之利茲以歲閱授爾  
階文林郎錫之勅命夫自爾祖父以及爾兄宣  
猷著作並爲國楨今爾才守兼茂庶幾紹庭勿  
替矣尚益勵先勞拊循不倦將體國承家悉于  
是在朕不忘尊顯汝欽哉

直隸寧國府涇縣知縣曹谷勅命

勅曰朕惟陪京吾股肱地亟欲崇獎賢令以示



風厲而涇邑屬在宣城囂豪浮詭自昔記之有  
能奉職敷化以臻上理璽書九首被已爾直隸  
寧國府涇縣知縣曹谷英才干莫令度珪璋掄  
自制科試于望邑而爾持行潔清勞心撫字廉  
能生畏慈母兼以神君政足代年夏日濡之春  
雨百里譽高鸞鳳三年節比羔絲是用授爾階  
文林郎錫之勅命夫邑令備六察以勵風猷雖  
齋民社之司寔裕耳目之選爾業已才守並茂  
威惠允孚覘所表監矣永肩乃心以益懋多于  
前功朕且有殊擢欽哉

直隸太平府當塗縣知縣何舜岳勅命

勅曰朕惟留都股肱地商民輻輳冠蓋紛紜號  
稱衝劇而平南尤甚微精明廉幹之吏何由臻  
厥理而副明命爾直隸太平府當塗縣知縣何  
舜岳通才敏識介節貞操軒對掄英邑符試政  
而爾守勵凝氷澤宏膏雨撫字周于萬姓春滿  
窮簷網紀寓于百爲風清孔道救荒而瘡痍立  
起興學則賢哲第升績比中牟繁移東輔茲旣



寧海府志全集 卷之八 制誥  
調爾錫邑矣仍以歲閱授爾階文林郎錫之勅  
命國家選耳目之司多取諸賢令謂其兼六察  
之備風猷節槩所素礪也爾業已才守並茂聲  
實允孚異日建豎可覘矣益勵遠猷需朕隆寄  
欽哉

直隸蘇州府嘉定縣知縣柴紹勳勅命  
勅曰朕念東南民力之竭圖所以休養而寬恤  
之非賢邑令莫與任此已有能惻惻無華拊循  
不倦以稱職聞者何難璽書褒美之爾直隸蘇  
州府嘉定縣知縣柴紹勳丰姿峻潔識度淵純  
擢對軒墀綰符巖邑而爾守絕纖塵才如利器  
催科寓之撫字博大運以精明廉足生威憑叢  
之奸自戢誠能畏志穿角之孽潛消河渠開永  
賴之功藻頌洽環橋之化花村警絕雉野聲嬌  
可謂祗厥叙已是用授爾階文林郎錫之勅命  
夫吳俗不患不華患不塞爾士口競于文采民  
日競于浮麥囂陵紛拏所自起也傳曰惟禮可  
以已之詩云率履不越遂視旣發是在廩廩德



讓君子矣尚益懋倡率以需醇醲之化朕且顯  
陟汝

命  
夫吳原任直隸鎮江府金壇縣知縣霍維華勅

勅曰朕念東南財賦之地慎簡邑令俾職撫綏  
有能奉法循理孳孳不倦者既不難移之繁劇  
以盡其才又不愛錫之封璽以旌其勩恩至渥  
也爾原任直隸鎮江府金壇縣知縣霍維華英  
姿峻潔雅度恢宏擢對大廷司符巖邑而爾守

勵飲水才如游刃心存愛節風生滿縣春光  
著別釐月映一庭秋色撫字切而轉輸恐後鼓  
舞勤而譽髦蹶生勞勩已及三年清白猶如一  
日茲旣調爾爲蘇州府吳江令仍以舊闕授爾  
階文林郎錫之勅命夫吳江視金壇不啻繁鉅  
矣志稱其俗尚文事佛奢靡奇巧與日俱長如  
水之橫流不以禮隄防之不止也爾業以才守  
兼茂師帥有方尙務以治金山者治松陵也將  
砥柱世風實始基之朕且顯陟汝



寧波府志卷之八 制誥  
直隸鳳陽府霍丘縣知縣王世蔭勅命

勅曰朕惟邑令于民最親謂其朝施恩而暮見德也矧當災沴頻仍之際有能至誠仁愛拊循不倦以予惠我元元可無褒寵以彰勞勩爾直隸鳳陽府霍丘縣知縣王世蔭峻潔丰標淵澄識量大廷擢對壯邑剖符而爾稟家承以服官本經術以飾治操同齒檠政若流膏廉足生威積蠹與豪強屏跡身先化導士風與民俗歸淳當饑饉之游臻如髮膚之受病博施廣賑活數

萬之生靈築堤墾田垂百年之永利萑苻息警囹圄生春所司以爾績來聞是用授爾階文林郎錫之勅命夫霍邑屬龍興重地下民疾苦朕方什伯念之爾業已靖共厥職惠此一方矣尚益勵成勞務宏永賴朕不忘顯陟汝

直隸廬州府廬江縣知縣李蕃勅命

勅曰朕惟廬江介在留輔民務殷繁更倍他郡國令茲土者而以最績聞良勤瘁矣酬庸之典尤亟也爾廬州府廬江縣知縣李蕃家學淵深



志操嶽峻大廷擢穎望邑可符而爾節勵飲水  
才如導窾明搜宿蠹清風消六案之塵慮徹窮  
簷春雨潤萬家之屋催科不擾而民樂轉輸色  
笑時承而士歌樂育茲以歲闋授爾階文林郎  
錫之勅命茲者天災流行飛蝗南徙而廬不爲  
害徵汝績矣益務拊循不倦朕且顯陟汝欽哉  
直隸淮安府山陽縣知縣廬洪珪勅命  
勅曰朕惟淮陰至難治也而歲之不易齊魯流  
離蔽淮而下尤難治之秋也有能內殫拊循而

外宏還定者古良吏弗過已爾淮安府山陽縣  
知縣廬洪珪冰玉貞操琮璜粹質擢自廷對出  
縮邑符而爾守勵四知才堅百鍊心誠保赤撫  
摩春滿花封惠惡拯犴勞來鴻歸樂土士有薪  
樵之譽野無萑苻之驚最奏已及三年清風皎  
如一日是用授爾階文林郎錫之勅命志稱淮  
甸人多勇敢士任氣節蓋聖祖龍興之地其遺  
風猶有存者力崇教化以復盛治庶表海名邦  
不虛也爾尚益懋宏猷以需顯擢欽哉



直隸揚州府泰興縣知縣楊國柱勅命  
勅曰朕軫念元元嘉與賢邑宰安定之寧惟是  
踔厲爲威以標疆直之譽要在拊循不倦力行  
教化即史乘所稱茂以尚已爾直隸揚州府泰  
興縣知縣楊國柱峻肅英標澄泓器品軒廷擢  
對巖邑司符而爾守絕纖塵才精百鍊陽驕不  
嗜門無請謁之私害馬必除庭絕憑叢之隙節  
財省役惟留不盡之利以與民興道作人務崇  
有恥之良以勵俗允矣鳴琴之理居然馴雉之

風茲以歲閱授爾階文林郎錫之勅命志稱  
陵幽邃民多朴野乃風會日趨邇亦不無少訖  
焉不曰惟禮可以已之乎爾業以奉法循理著  
矣尚益勵化導務挽醇風朕且藉以佐隆平之  
理欽哉

直隸揚州府高郵州興化縣知縣李懋芳  
勅命  
勅曰維揚爲江淮一都會而興化屬在高陸號  
東西喉領尤稱難治有能奉法循理與民休息



寧波府志卷之八  
者賜璽增秩所亟被已爾直隸揚州府高郵州  
興化縣知縣李懋芳峻潔清標淵醇雅度大廷  
擢穎巖邑司符而爾能守勵飲水才優運郢悉  
心撫字痾瘵時切于納溝畢慮興除蠶剔潜消  
于憑社雨潤桑麻之野風清棫樸之歌薦剡屢  
騰程書績最是用授爾階文林郎錫之勅命邇  
者吏治不患無名而患鮮實不難銳始而難厚  
終爾業已才守兼隆聲實並茂矣益勵初忱勉  
終令譽朕不忘顯陟汝欽哉

浙江寧波府慈谿縣知縣陳其柱勅命

勅曰蓋聞陰雨膏黍行潦濯壘謂其施有漸而  
注不竭也邑令有能廉明仁愛專施德化而百  
姓望之若時雨歸之如流水卽古稱良吏弗過  
已爾浙江寧波府慈谿縣知縣陳其柱英標嶽  
峻雅識淵澄擢對楓庭綰符巖邑而爾操嚴水  
槩才若鑛錡廉足生威明能燭隱賑憫恤惠  
必究于單民剔蠹除殘法不負乎三尺吏呼無  
怒民趨惟正之供師帥有方士擴登庸之路春



生園士警絕萑苻茲以歲閱授爾階文林郎錫  
之勅命夫德融茹吐政戒兢練不蹕厲爲威不  
姑息爲惠治之經也爾業以材守並優恩威兼  
著矣尚益漸漬而灌輸之令澤與慈水俱長也  
朕不忘尊顯汝

浙江紹興府山陰縣知縣張捷勅命

勅曰朕惟邑令親民棼亂咸理故稱職爲難而  
山陰政事煩擾訟誨殷積尤自昔記之非藉廉  
明之才曷奏清寧之理勞績旣著寵秩宜加爾

浙江紹興府山陰縣知縣張捷峻整丰姿堅凝  
識度大廷擢對巖邑司符而爾操勵飲冰才如  
游刃案無留牘舞文之隙潛消吏不暴呼惟正  
之供自裕築堤捍海民騰永賴之歌興學作人  
士擴登庸之路弭盜饒其生計警絕萑苻治獄  
矜其得情春回園士惠政已聞大吏清風較若  
素儒茲授爾階文林郎錫之勅命夫風俗之日  
下亦如水橫流不以禮隄防之不止也志稱稽  
俗尚本業而重犯法不以奢麗爲事乃今月異



而歲不同矣爾旣力行教化庶幾德讓遺風焉  
益勵成勞以需顯陟欽哉

浙江紹興府餘姚縣知縣董羽宸勅命

勅曰越州山水之邦素稱饒沃姚江則負海而  
窪地多斥鹵民勞賦困舞文者時有非得廉明  
之吏何由拊循吾民而宏上理爾浙江紹興府  
餘姚縣知縣董羽宸英標嶽峙偉識淵停擢自  
明廷試于望邑而爾百鍊成才六廉爲治催科  
無擾故輸納爭先冰檠自堅故苞苴屏跡蠶奸

絕城社之孽庭若水清育才兼藻鑑之精士如  
穎脫萑苻警息潮汐波恬茲以歲闋授爾階文  
林郎錫之勅命夫姚俗禮義相先家絃戶誦故  
人文獨盛而邇則日習澆競不無少慮焉爾業  
已消其褊心鎔其戾氣庶幾德禮之治矣尚圖  
所以永終譽者朕能尊顯汝欽哉

浙江嚴州府建德縣知縣魏弘政勅命

勅曰朕惟睦州據浙上游當閩歙諸道之交夾  
山谷而邑民貧而嗇故號難理非得良吏拊循



而噢咻之胡由使人和俗阜而祇厥叙爾浙江  
嚴州府建德縣知縣魏弘政才識通明操持峻  
潔棘闈脫穎槐市譽髦簡自師儒俾司民牧而  
爾守嚴一介治總六廉理牘消積案之塵狐叢  
屏跡勸課踵戴星之躅桑柘成林士有絃歌民  
無終訟茲以歲闋授爾階文林郎錫之勅命夫  
桐江一絲風高千古履斯邑而懷仰止欲不爲  
廉吏不可得也惟是終始一節以宏表帥其干  
勵世磨鈍追古輯睦之俗易易爾爾其欽哉無

廢朕命

浙江嚴州府遂安縣知縣吳之俊勅命

勅曰朕軫念民瘼嘉與良有司究宣德意矧新  
定邑阻山谷間民貧而嗇有能拊循不倦以治  
狀聞者其於壘書增秩豈有靳焉爾浙江嚴州  
府遂安縣知縣吳之俊珪璋偉器黼藻宏猷射  
策楓廷分符巖邑而爾守嚴冰檄賦黠繭絲振  
刷清城社之奸一庭秋肅撫字洽桑麻之慶四  
境春溫花村之驚吠稀聞藻類之薪爨式擴閱



此三年之績嘉乃百里之材是用授爾階文林  
郎錫之勅命志稱睦州之俗人和物阜多文學  
之士此興道致理之資也爾業已政崇清靜教  
溥絃歌有凜凜德讓之遺風矣益虔初志永觀  
厥成卽由此出振風猷入司憲度可也

江西吉安府吉水縣知縣溫臯謨勅命

勅曰朕慎選邑令以求民莫惟是吉水于江右  
素稱煩劇而歲凶爲災民亦勞止非赤衷白意  
以弘保定者何由臻厥理爾江西吉安府吉水

縣知縣溫臯謨學有淵源才優經濟大廷擢僚  
巖邑縮符而爾飲水持廉烹鮮爲理案無留牘  
梁有懸魚值水旱之頻仍若疾痛之曲已賑饑  
拯溺罄俸入以予民除煩解苛竭拊循以代歲  
遂使昏墊流離之衆轉爲樂郊安宅之歌野徧  
桑麻士宏棫樸庶幾良邑宰已茲以歲閏授爾  
階文林郎錫之勅命夫善治者以民治民非以  
令治民爾惟不習恢張不徇非譽以與民休息  
故足術也頃爾兄業用此以榮臯所生已爾尚



益勵成勞以永終譽朕且顯陟汝

江西吉安府永豐縣知縣秦延丞勅命

勅曰朕慎選邑令使問民疾苦宣鬯德意永豐屬在螺川素稱繁劇而災沴薦臻士民其瘵非廉明仁愛之長孰宏厥理爾江西吉安府永豐縣知縣秦延丞粹潔英標澄泓遠器大廷擢對巖邑司符而爾稟家傳以服官操嚴清白本經術以飾治政治惠鮮剔釐城社立清賑卹哀惻頓起催科不擾民樂惟正之供鼓舞有方士快

登庸之願茲以歲闋授爾階文林郎錫之勅命昔爾祖周踐郎署樹績夏卿惟廉靜正直以至此爾宣猷一邑實兼六察之備覘所表見已益宏遠猷以需顯擢體國承家胥于斯在懋哉江西贛州府贛縣知縣楊汝昇勅命

勅曰朕惟虔南之邑十二而供億之費奔命之勞特萃于贛重以水旱頻仍凋瘵彌甚非廉慎精敏之長何由衽席吾民而膏濡茲土爾江西贛州府贛縣知縣楊汝昇學世青箱才同白璧



鄉闈脫穎巖邑分符而爾凜家法于四知振風  
猷于六察黜繭絲而勤撫字民樂轉輸節糗水  
而惠冲疲邑無苦役官墻之建以興教棧樸歌  
喧壇壝之修以禦災雨暘時若程書來奏朕是  
用嘉茲授爾階文林郎錫之勅命夫韜自文成  
倡道家理學戶儒修而士大夫獨持清議以勵  
世風故廉吏服官茲土最易表見爾業已廩廩  
德讓矣益勵貞操以需顯陟欽哉

福建福州府侯官縣知縣孫國禎勅命

勅曰朕惟閩中麗省之邑介在海濱最稱繁劇  
惟是內竭撫綏外宏保障繫賢有司是賴嘉績  
旣彰褒崇可後爾福建福州府侯官縣知縣孫  
國禎學稟家承才優世濟大廷擢對巖邑縮符  
而爾志切飲冰才如導窾政平訟理無追呼迫  
擾之煩蠹剔奸消絕強梗囂陵之跡惟時勞來  
變斥鹵爲膏腴未雨綢繆播風聲于海甸長谿  
之崇陰方茂榕城之懋績式彰是用授爾階文  
林郎錫之勅命夫閩邦地陜民稠生計特鮮倚



海爲利亦其勢然也獨不曰稽其往返察其動  
靜既可杜奸萌于出沒兼可得了壯于清勾乎  
爾業已敕寧茲土其益宏遠猷以永固吾圉何  
難顯陟汝

湖廣武昌府江夏縣知縣徐日久勅命

勅曰朕惟麗省之邑政務旁午號稱難治而楚  
爲甚故嘉與良吏輯柔安定之有能奉法循理  
副茲德意者褒崇尤亟已爾湖廣武昌府江夏  
縣知縣徐日久峻潔英標澄泓大器軒掄擢對

巖邑司符志不渝而自清識周歷而彌練奉楚  
珩而潔已室有懸魚揭秦鏡以燭奸庭無伏鼠  
興除有漸而廢墜具修撫字惟勤而輓輸恐後  
花村絕警吠之響藻泮擴薪樵之途所司以爾  
績來聞茲授爾階文林郎錫之勅命夫邑令仁  
民如水之澤物優游而浸灌之故稱樂利焉爾  
業以純良著矣尚益勤休息使民之被澤有如  
此江漢也朕能尊顯汝

湖廣荊州府江陵縣知縣李顯勅命



勅曰朕軫念元元嘉與賢令尹撫綏安定之而  
荆南地當四集爲上流重鎮尤稱繁劇有能以  
廉明剗割之才承流宣化者朕不難璽書褒美  
爾湖廣荊州府江陵縣知縣李顯英資岳峻朗  
識淵停擢對大廷握符巖邑而爾堅旭日凜冰  
之度簞簋惟嚴運批郤導窾之才紛紜立解法  
嚴釐剔潛消稷下封狐念軫痼瘵徧集澤中歸  
鴈月朗桑麻之野風生芹藻之春茲以歲閱授  
爾階文林郎錫之勅命昔劉昆晉陟卿寺漢帝

猶追敘其江陵異政命書史策傳爲明良盛事  
爾尚益勵成勞務永終譽朕且顯陟汝欽哉

山東青州府益都縣知縣田仰勅命

勅曰夫邑令于民最親謂朝施恩而夕見德也  
乃當齊魯積困之區而並奏清寧之理雖古良  
吏蔑以尚已爾山東青州府益都縣知縣田仰  
峻潔英標端凝偉度大廷崑對望邑剖符而爾  
稟家承以服官緣經術以飾治勵冰檠堅持之  
操廉足生威值災沴頻仍之餘政能代歲汶邑



之拊循既瘁益城之勞來彌勤轉瘠土爲樂郊  
歌騰孔邇登勞民于化國屋比可封覽爾程書  
朕心嘉悅茲授爾階文林郎錫之勅命昔宋臣  
有罷里正以息民而賦自集朝廷至頒以爲天  
下式非益都故事耶爾業已清靜宜民爲齊魯  
最矣益勵厥終以宏畫一之化雖天下亦一邑  
之積也朕且顯陟汝

山西太原府榆次縣知縣劉似鰲勅命

勅曰朕閱史至尹鐸爲晉陽黜繭絲而先保障

輒慨焉慕之夫榆次亦晉邑也有能壹意拊循  
式宏斯烈者宜何如褒異之已爾山西太原府  
榆次縣知縣劉似鰲珪璋偉器干鏌英資掄自  
大廷踐更劇邑而爾一塵不染六案俱清惠必  
究于單悖膏盈芘黍法勿遺于豪右釁絕憑叢  
所去見思曲沃之棠陰方茂所至見德涂水之  
絃誦彌謹是用授爾階文林郎錫之勅命志稱  
晉俗憂深思遠淳儉好學蓋蟋蟀之遺風在焉  
而邇乃浸淫于澆也將有司簿書是亟而德教



不無少遜歟爾業已正已率物悉慮作人庶幾  
凜凜德讓矣無棄成勞以需峻陟欽哉

山西平陽府臨汾縣知縣張惟一勅命

勅曰晉州衝繁之地昔稱難治而重以歲之不  
易士民其瘵非得賢有司拊循而調劑之未可  
幾而理也爾山西平陽府臨汾縣知縣張惟一  
端醇器識沉練才猷擢穎大廷綰符望邑乃從  
平陸轉劇汾城而爾潔志勤民精心庀事法不  
移于豪右澤必究于單糶糗水之節以當衝邑

無疲役衣襦之戒以待歲室有蓋藏下陽之棠

蔭方深平河之黍苗載咏是用授爾階文林郎

錫之勅命夫三晉之民勞瘁甚矣僅僅河東頗

號殷富而遇災祲卽稱困極寧獨歲寔爲政無

亦有司傳舍其官而惠不終究也爾業以治最

聞矣勉旃無倦以永有賴于茲土朕不忘峻陟

汝

山西平陽府解州芮城縣知縣郝土膏勅

命



空齋齋齋全集 卷之二  
勅曰朕讀桑鳩之詩蓋反覆于良人忍心之際  
而知芮伯之憂民切也爲吾芮令而能壹意勤  
民以弘保惠亟嘉予之已爾山西平陽府解州  
芮城縣知縣郝土膏操持峻潔識慮精深擢穎  
大廷司符望邑而爾四知是凜三善允兼運批  
卻導窺之才案無塵牘秉燃犀照膽之鑑廷絕  
叢奸先保障而黜繭絲輸將恐後擴薪槁而宏  
髦譽絃誦盈郊可謂祗厥叙已茲授爾階文林  
郎錫之勅命夫周官計吏道在六廉宋臣有咏  
涼軒而致慨者義與桑柔之刺若一轍也爾身  
履斯地聞之熟矣業已才守並茂爲循良最尚  
勵厥終以副迺求朕何難顯陟汝欽哉

河南歸德府鹿邑縣知縣董心印勅命

勅曰朕惟睢陽諸邑鳴鹿號最劇地廣民貧徃  
繁賦重上下之間動輒掣肘非誠心恤民者鮮  
克宛轉調停副朕德意爾河南歸德府鹿邑縣  
知縣董心印志潔操清材閎識練鄉書拔雋巖  
邑展庸本家學以服官體民情而出治矜疲協



濟貽憚人之息肩請命均糧蠲累年之浮額穿  
渠垂保障之澤禱雨回蝗魃之災教民仁讓風  
成作士人文霞粲名優八邑績最三年茲用授  
爾階文林郎錫之勅命夫稽古循良道州輕賦  
中牟息蝗西門灌渠嶺南興化並以治行高等  
流芳至今爾兼有衆美朕用前代故事璽書旌  
異將以觀厥成也益勵初忱勉圖後效欽哉

四川保寧府昭化縣知縣陳時宜勅命

勅曰朕聞唐刺史按部益昌其令何易于念百

姓耕蠶方亟躬自引舟迄今稱循吏焉爲吾吏  
者有能愛民任勞不愧何令奚靳璽書旌異之  
爾四川保寧府昭化縣知縣陳時宜琳瑯雅度  
冰蘖清操擢穎賢科剖符壯邑仁心爲質絕無  
緣飾之情殫慮求寧不爲旦夕之計振刷城無  
狐伏拊循野有鴻歸四封絕鳴吠之驚百里洽  
絃歌之化庶有古循吏風已是用授爾階文林  
郎錫之勅命夫數易長吏相益爲亂故本朝久  
任之法獨重守令爾治昭六載矣吏習民安績



用告成朕行有不次之擢尚克時忱洵需簡命  
四川叙州府富順縣知縣孫杰勅命

勅曰朕惟健爲諸邑以富義爲首稱其俗愿慤  
知禮遜而奸宄鴟義時亦有之非得廉靜之吏  
除煩滌苛而與民休息未易馴而理也爾四川  
叙州府富順縣知縣孫杰才猷宏練志節堅凝  
擢自大庭試于望邑廉能並懋風清四境之塵  
茹吐兩捐政兼六察之倘緣經飾治王純仁之  
雅度依然崇化宜民虞夷簡之盡心特著野無  
鳴析邑有絃歌覽爾程書中于賞率茲授爾  
文林郎錫之勅命夫邑令之事與六卿相表裏  
饒爲令而以振風猷司封駁無弗裕也爾業已  
處脂不染理劇有餘覘所樹立矣庶永終譽以  
需顯陟欽哉

廣東廣州府順德縣知縣施樑勅命

勅曰粵東諸邑越在數千里外負山阻海號稱  
煩劇朕甚憫然注念民瘼不啻若輦下也有能  
處脂不潤在劇能調以上理聞不難璽書褒美



之已爾廣東廣州府順德縣知縣施樑清標粹  
蘊亮節閔才始擢制科兩司壯邑而爾裊躬清  
慎蒞事精勤明威以無欲而自生簿稽隨所至  
而輒辦振刷則城無狐伏風運郢斤拊循則野  
有鴻歸霖施商澍花封絕警吠之響藻泮擴薪  
煇之途是用授爾階文林郎錫之勅命夫陰雨  
可以膏黍行潦以河濯壘謂其需之有漸而挹之  
不竭也爾業已施澤及民矣尚益漸漬而灌輸  
之令澤與南海俱長也朕不忘顛陟汝

廣東廣州府東莞縣知縣周昌晉勅命

勅曰朕惟嶺南諸邑東莞最稱繁劇重以水旱  
頻仍閭閻卒瘁非得仁愛廉明之長何由膏濡  
吾民而奠麗茲土也勞績旣彰褒嘉可後爾廣  
東廉州府東莞縣知縣周昌晉孤標峻節朗識  
通才擢穎楓廷綰符巖邑而爾守嚴繼介治振  
六廉挈秦鏡以燭奸叢狐屏跡調宓絃而宣化  
襦袴興歌拯濟多方出蒼黔昏墊之域勞來不  
倦還鴻鴈中澤之安花封之鳴吠稀聞芹泮之



寧海府志卷之六  
新猷式擴茲以歲閱授爾階文林郎錫之勅命  
志稱海濱質直尚信得風華之雅此致治資也  
爾業已化導有方矣益勵廉勤以永終譽卽由  
此維風振紀可也朕不忘顯陟汝

廣東韶州府海陽縣知縣沈鳳超勅命

勅曰朕嘉惠黎元南望南越至于海濱俗化器  
陵訟誦殷積憫然念之有能廉明慈愛惠此一  
方墾書褒美所弗吝已爾廣東潮州府海陽縣  
知縣沈鳳超乃原任江西布政使司左布政使

九疇之子丰標峻潔器識沉深步武制科綰符  
海邑而爾本家承以服官政守絕纖塵緣經術  
以飭風猷惠周百里廉能生畏狐鼠之孽潛消  
政緩催科飛輓之輸恐後民無終訟士有絃歌  
是用授爾階文林郎錫之勅命昔爾父展采中  
外馭歷臬藩惟是不狃家世獨立獨行以自表  
見爾業已茹吐兩捐材守並茂庶幾不墜先烈  
矣益宏遠猷以需峻陟將體國承家胥于是在  
欽哉



寧澹齋全集卷之十一終

寧澹齋全集卷之十二目錄  
館課

擬漢武帝罷田輪臺詔

聖主畏天恤民紀頌

聖母萬壽頌

君臣交儆箴

意必固我四箴 并序

擬東方朔上泰階六符奏

擬上安邊禦虜疏



寧澹齋全集卷之十二目錄  
擬講讀官請 皇太子暑月宮中視學箋

新都楊永嘉張二文忠公贊 有序

京營戎政考

漢文帝誅薄昭或以爲仁厚中有神武田

叔燒梁獄詞或以爲善處人母子兄弟

之間二事寬嚴得失若何對

獨此最爲有得論

駁文中子好詐論

爲之自我者當如是論

正直忠厚辯

惟君子爲能通天下之志論

行天下之大道論

四維論

寧澹齋全集卷之十二目錄

寧澹齋全集 官果



寧澹齋全集卷之十二

句章楊守勤克之甫著

館課

擬漢武帝罷田輪臺詔

詔曰聖王不廢本業以開遠利故厥問不隕詰  
后必擇後是以替前非故光終則吉朕明不及  
遠不察匈奴縛馬之詐博謀群臣慎選卦兆遣  
貳師西出擊之乃者貳師敗衄將投裔土填厓  
輜重駝馬殆盡時予之辜心甚痛焉今有司復



議遣屯田卒田輪臺以東增設尉侯募民徙實其地稍築列亭連城冀以威西域輔烏孫夫驅無辜之民而殉荒徼非仁也轉未起之卒而蹈前車非智也重以再誤長此安窮朕猶念先皇帝恭儉休養釀成富安獨以平成貽之朕躬是用不惜東西征伐揚漢威靈除兇千古然軍興以來筭酤徵榷幾無遺餘朕竊下憫閭閻上愧幽冥猶然足用爲悔况乃舍原屯而趨曠土旣重負以徙之復疲力以墾之民則何辜業愈自

弱欲以遍置酒泉虛聲威虜不已難乎朕視輪臺其猶石田也願有司悉體朕心共宣德意以蓋前愆惟是勤國恤力本農日討功令而申飭之以慎固邊防鎮撫我百姓其或匈奴用悔于厥心則輪臺以外固外藩也其慎勿輕議舉役徒駭衆心

聖主畏天恤民紀頌

伏讀勅諭戶工二部以天災頻仍民力殫盡曠使悉行罷撤務盡歸有司數年蠹政一旦更



新凡在普天已同忭舞叨陪法從尤切對揚謹  
載筆恭紀勒頌以垂無疆者上避殿垂拱恭  
默思道公車之牘以時裁斷每四方水旱災狀  
輒愀然色動者久之先是三殿災賀蘭冽水鬼  
方之境六師屢移大司農少府詘無以應上  
清問下民求可以籌軍國者於是棄弁因中使  
進言諸丁幣兩稅綦備矣民不勝加因利之策  
二不加常賦而用自足其一開礦其一權關皆  
前代已試事諸執事陳其不便曰弁璫不齒冠

紳藏饗餐心方命圯族不可庸上若曰朕其  
試哉試不效有常法效而厲民亦有常法諸璫  
遂乘傳四出棄弁前驅當是時楚璫最橫最先  
敗齊清源吳姑胥洪湖口皆商賈輻輳地舟車  
爲梗徐璫緩誅厥黨內訌籍貫入官府逾於歲  
進數倍諸珍異竒玩皆尚方簿正所不名海外  
採金使者挑釁機山呂宋紅番波臣不靖諸前  
後所上便利計皆不售不上置諸奸法諸闕不  
補弁近署兼攝之又今歲夏五雷起南郊望杆



弗戒秋仲武庫火光燭大內淮陽天鳴南都星  
移皆次第至其上惻然不寧鑒天威之屢播也  
祖法之當監也民之不可狎也手詔司徒司  
空悉廢遣礦使不署諸稅使徵發期會聽守令  
進御之餘出餉九邊旬日間諸臺諫次第予見  
職異時坐忤中使負疆名者皆相繼破械出之  
其叅隨司房原奏土民下詔獄者皆論死臣聞  
君猶天也天必悔而後徵人君格天之誠君必  
悔而後盡明主事天之實辛壬以來無歲不災

無災不創天心之不悔甚矣迺皇上時時警  
悟時時脩省至於今日之詔而實見之興革是  
上心之悔也壅蔽豁然煬竈必照萬方鼓舞  
百辟欣承稟慈訓以周旋廣錫類於休養至  
孝也沛湛露於彌天投貔豸於有昊至仁也念  
鄙屋之艱危信容光之必照至明也執王鈇以  
不原室鼠穴而莫啓至斷也皇上具堯舜大  
聖之資體天地好生之德悔心一萌仁政四達  
向者公車之牘祇屬過計無當耳易曰復其見



天地之心先王以至日閉關月令仲冬罷官之  
無事去器之無用者上之悔悟上應復機日  
月之食不吝不遠是時慈聖皇太后甲子甫  
周萬年伊始元孫育於東宮臘雪兆歲卿雲在  
天上帝居歆其惟景響此聖德之通於天載可  
知也臣謹次第其事恭述爲紀爰繫之以頌  
燭銀之氣黃金之膏地不愛寶民亦用勞抵璧  
投珠以固而閉敬天之威無然泄泄載塞利穴  
載室盜源我皇明明弗倡游言

右封山頌

彼逐者時登壘以望彼權者子母熙熙攘攘彼  
越本計胡不防彼犯危險通彼四方彼筭之權  
之垂橐洗囊帝鑒其情薄征惠商千里如砥  
道無豺狼流水纏屬歌咏路傍

右易關市頌

薪之槩之生此四國予玦予環咸惟帝德雷  
霆震摧日月薄蝕天朗氣清皇建其極爲政  
在人事天以寔國珪彙征其惟弼直昔虛若無



今茲廣植佩玉鏘鏘各脩厥職

右賜環頌

帝曰其咨若盧之繫念茲桁楊胡以卒歲城旦  
鬼薪比於徒隸 帝曰其咨爾安執契彼其宵  
人實惟壅蔽害於國家自絕厥世爾情當原爾  
罪無例穆穆聖人能哲而惠

右洗冤頌

聖母萬壽頌

維 皇統天聿弘孝治躬行率先尊養克備懿

鑠慈闈佑啓元良柔順以貞配地無疆粵昔承  
乾翌我 穆廟鸞石應文玉衣協兆宮庭肅肅  
昕夕祁祁神靈是妥萬物攸宜璇室發祥虹渚  
遶慶篤生我 皇德躬上聖恭默在宥治臻隆  
平亦越三紀寢昌寢明賦集九州球共萬國養  
以垓埏孝通玄極爰萃太和爰鍾繁祉鳳紀初  
周悅辰載始時維長至履端伊新壽歷逢之保  
右用申 皇衷燕喜錫類外家䟽榮增祿恩寵  
游加內德彌虔闡政靡懈慎終如初徽音永介



女中勲華當世任姒宴及皇天綏我庶士遙望  
椒掖虎拜呼嵩岡陵比奠松柏比崇瑞靄克庭  
天休罔替弗祿萬年本支百世

君臣交儆箴

統天維君輔君維臣克艱共矢大命永申天今  
方濟昭鑒不忒我儀圖之伊胡爲慝君曰欽哉  
咨爾臣庶胡不相畏無敢戲豫於赫皇陵豐  
隆示譴胡以禳之丕基永奠何物妖孽蝕我維  
喬胡以剔之易楛而扶彗孛爲厲欃槍載興胡

以弭之四方以寧烈焰甫息靈潦湯湯積土爲  
沼稼穡卒痒流離載道爰及矜人曷其靖之載  
彼穫薪官之失德靜言庸違簠簋不飾比周爲  
非予違罔彌嘉猷罔聞聚羶若蚋附熱如熏甲  
是乙非莫執其咎利則纖趨害則處後有一于  
此是曰背公戒之戒之蹇蹇匪躬庶幾夙夜佛  
時仔肩弃德弗類是誰之愆小大稽首服膺敢  
忘臣道無成不易維王天無常親法祖則格祖  
德維何不顯無射一日二日曰有萬幾所其無



逸問夜求衣洋洋郊廟秩秩明禋德馨是薦必  
躬必親無曰予聖千慮一失止輦霽威賜環造  
膝朝廷錙銖閭閻鉅萬瓊林豐樁身則府怨維  
此忍心蝨賊蝨疾竭澤焚林如云不克除害務  
速樹德務滋式遏寇虐惠此黔黎一人克謹百  
度維貞式救爾後終和且平危其有安災反爲  
瑞川岳貢珍苞符獻異虞庭吁咈周阿矢音永  
言一德匪今斯今

以神意必固我四箴

并序

心無將也而何弗將無迎也而何弗迎故曰物  
物而不物于物天地間物皆我也實非我也我  
亦物也實非物也有意繇于有我有我成于有  
意成我則我一物而已矣夫人上下八極周流  
六虛惟心之歸心既無物物盡去心尚得爲我  
乎夫心神物也寂則灰木妄則藩籬起念卽覺  
隨覺卽消神之明之慎厥初分故意不着我我  
原無意我不爲意意原非我無意之意曰誠曰  
神有意之意卽必卽固及成其我紛紛綸轆轉莫



之勝脫已着欲着理亡羊則均乍滅乍萌反覆  
滋甚則我爲之根而意爲之驅耳故曰天地無  
心而成化聖人有心而無爲夫既已有心矣且  
得云無爲乎無爲者不于心之中更起一心也  
心之中不更爲一心則意必固我一切化矣哲  
人知幾君子慎動所爲不物于物也作四箴  
心如鑑空何思何慮形骸起見而意乃據慎獨  
則誠克念作聖豈其滅之曰大居敬非好也  
心無右意箴

事無定形胡心妄設揣之逆之是爲繩紲失  
用罔得亦硜硜虛中觀理無寧而櫻

右必箴

無可不可至圓而神孰執不化遂封其畛與時  
推遷因物察則其靜也虛其動也直

右固箴

天地萬物誰非我者強事從心塊然成我思不  
出位不獲其身太虛爲徒是謂至人

右我箴



擬東方朔上泰階六符奏

臣朔昧死上言臣竊惟天人交與捷于影響吉凶垂象莫著于星星精也陽之榮也陽精爲日日分爲星人主南面統天居上臨下於象爲日於德爲陽衆星屬焉故陽德方亨則星辰順軌是爲治徵陽事失職則星辰匿曜是爲亂徵此之不可不省也臣切見陛下過聽壽王之諛詞欲大起林苑胡不以泰階六符之說徵之臣謹按天有三台謂之泰階兩兩成體三台故六觀

色以知吉凶故曰符黃帝經以上階二星分男女主中分諸侯三公及卿大夫下爲元士及庶人星雖有六一氣相聯故三階平則上下咸得而爲太平不平則上下睽而爲亂故王者行暴令好甲兵脩臺榭廣苑囿則上階奄奄䟽濶兩階隨之何者人主明堂正殿以出政也廣廈細旃以勤學也深薨曲房以養體也四時有定居朝夕有定處游晏有定所故皇極以建內政脩明彤管進御貫魚順序上階應之厥惟焜耀刑



于爾家以及朝廷以及天下百官率職大法小  
廉萬民樂業邇安遠至中下二階其孰弗平若  
乃離亭衆建必不樂聞待罪之言遊障廣裘必  
不克以紀過之女爲傾宮瑤臺則茗華必刻廣  
沙丘苑臺則長夜必聞女謁日盛陽德日昏若  
之何上階不奄奄也於是便娟內訌則二五外  
煬妖艷煽處則伎忒爲霍左周右召孰與州夏  
之適已也朝嬰夕側孰與儋石之娛志也堂簾  
潤絕手足腹心不相爲謀大臣解體衆正離居

邦君諸侯莫肯朝夕三事大夫莫肯夙夜中階  
若何不奄時則士不得傳言庶人不得傳謗在  
位者不得安其志百姓不敢禾稼以待荒度靡  
屆靡究則蝸蟻沸羹之勢成役徒隱囚則斬木  
揭竿之端伏下階安得獨明三階旣晦則五辰  
不撫七政不齊日月吉凶雷電失時妖星厲孛  
山崩川溢木恠虫孽之變交出互見而世道始  
不可爲矣今陛下卽位之初日食凡二有星如  
日夜出星孛于東北河溢平原大饑人相食此



不可謂非陰陽失節所致也茲且奪人膏腴夷人丘隴以大苑囿竊以爲星符兆變今寔當之矣若之何不省憂也臣又聞君德莫貴于恭儉莫戒于侈肆謙遜靜慤恭之屬也驕溢靡麗侈之屬也侈端一萌猶可遏止侈心一熾曷其有極故暴令甲兵臺榭苑囿此數者竝施而迭用之勢也故繁役不止必下峻誅之令斥地不已必開窮黷之漸有一于此是干天階矧其竝行必無幸矣陛下席高皇之鴻業承先帝之富厚

謂宜益駿惠而篤厚之採賢良方正之言黜諧臣媚子之說崇節儉之德遏奢靡之端防惑溺之私脩陽明之政其自阿房以南蓋屋以東宜春以西悉捐以還民專務正心以正宮闈正百官萬民如是而三階不平六符不耀未之有也臣朔謹奏

擬上安邊禦虜疏

臣聞國家之禦夷有有形之捍衛有無形之戩摩有形者可次第而核而無形者不可頃刻而



侯故夫備禦之貴預防範之貴周此上可得而  
責之下可得而效之而惟事權之掣肘衆志之  
解體則下既不能得之於上上安能獨得之於  
下釋此不圖竊恐不能安邊而能禦虜從古及  
今未之有也我朝自祖宗犁庭絕漠除兇  
雪耻復隻千古而正統之變至有不忍言者無  
非用事非人而中外喪氣卽主計大臣有無如  
之何乎以今皇上英明馭宇太阿在手固萬  
萬無此事而邇來權使恣睢內地既甚邊陲尤

亟坐令豪杰之氣日以消沮軍實之脩日以耗  
蠹人心之思亂者有不戰而潰之勢此詎可令  
胡虜聞也故臣以爲叛而討之服而舍之來則  
羈縻而勿絕去不狃安而弛備此制馭之道按  
轍而可循也以鼓奪鏖之勇則揀練宜先以振  
超距之風則糧糗宜足以嚴窺伺之隙則烽堠  
宜密以備躡入之虞則城堡宜繕此防禦之策  
按實而可責也而惟是事權掣肘衆志解體莫  
有甚於今者竊爲皇上陳之我國家設立



九邊各屯重兵統以大帥副以偏裨轄以憲臣  
而又鎮以巡撫聯以總督使上下統攝若身臂  
手指之相使將士協心若手足頭目之相衛故  
督撫大臣權莫重焉未有督撫約結不展而士  
氣可鼓者乃今建旄授鉞實握大寄而么麼闖  
豎橫肆狼貪淫逞虺毒心存矛盾勢務頡頏一  
經節制遂目爲阻撓詆爲凌轢而露章彈壓寧  
莫之懲使夫督撫不敢抗而憲臣而大帥而偏  
裨可知也彼夫聞者罔不扼腕憤忿而斬將搴

旗之勇已潛消于垂首喪氣之中如是而邊防  
尚可固虜患尚可弭乎故臣以爲督撫之當重  
一也九邊之道里雖遙而聲實相倚備禦之情  
形遞變而根本則同凡此土著之衆屯戍之卒  
皆藉其死力以執訊獲醜者以今滂霍無稼磬  
罄待哺而轉餉不繼脫巾之變時岌岌焉况重  
以連年徵權需索千端拷斃萬狀俾我有徒不  
苦掠于虜而苦掠于稅不願血戰于邊而願假  
手于敵一家思竄百家窺左足而先應一方欲



遲各方幸風聞而效尤即使虜弦未聞狼烟未  
警而鳴佩死綏之志已悉轉爲揭竿嘯聚之思  
如是而守尚可責必堅戰尚可責必奮乎故臣  
以爲人心之當輯二也互市之設雖屬羈縻然  
彼利于得幣此利于得馬未必非便計也往歲  
虜酋藉口幣惡動以羸弱相給而畜牧不良馬  
政病之乃今額解之繒帛日困于巧索而騎匹  
之精良盡入于內監駕言上供而陰壞互市之  
法恣意奪取而潛耗孳生之群使衛所不敢格

督撫不能詰一旦胡虜之鐵騎長驅而率欵段  
以角逐容可支乎故臣以爲市馬之當覈三也  
三軍之衆孰不畏敵然可使殉水火如赴而走  
死地若驚者賞罰當也往歲每遇虜入得不償  
失而掩敗以爲勝日不見敵而竊僵以奏捷冒  
功之患猶可言者自中使監軍彼其勇不足奮  
功而奸則足妬功辱旣足銷功而力又足攘功  
幸今 皇上鑒鎮守之覆轍堅持不許而師行  
必參操練必與慮無不庇其私人而奪公戰之



勲護其子弟而濫死士之賞陰懷他志默消衆  
心一旦有事孰肯出萬死一生之計而爲宵小  
賈利者乎故臣以爲賞罰之當議四也夫此數  
者而外其所係于邊計非乏然惟人心士氣事  
屬本圖勢關急務有不容不亟爲之慮者而其  
機惟在 皇上之收還中使臣請極言而無諱  
昔李郭之爲將也天寶之末抗方張之虜而有  
餘而相州之敗扼殘喘而不足非前勇而後怯  
此合而彼離也則惟觀軍容之置有以潛奪壯

士之氣而坐令五路俱潰也以今 皇上富有  
四海而礦稅之行又不爲不久通計每歲襁而  
入者動以鉅萬計假令出瓊林大盈之藏以養  
戰士何士不奮以克軍餉何餉不足以脩邊隘  
何隘不固縱使內帑之積吝不忍割內地之稅  
戀不忍蠲而邊防重鎮當急爲禁止者何乃不  
托國于無形之干城而托于不可守藏之財貨  
不寄命于無形之營衛而寄于毒藥猛獸之僉  
壬不慮傷督撫之體而顧慮傷徵使之意不虞



失士卒之心而顧虞失進奉之驩卽今收還不  
亟無以塞中外臣民之口遂使督責之政不可  
行于上而核實之効不可幾于下是掣肘之患  
非獨在督撫也且先移之 皇上矣解體之患  
非獨在將士也亦先歸之 皇上矣誠赫然收  
還以慰遐邇之望而事權歸于統馭可使輻湊  
而歸命勞民易于見德可使踴躍而圖報夫然  
後士卒不用命以責之將帥將帥不用命以責  
之督撫而邊防次第可舉又何憂虜哉釋此不  
圖殆所謂不能安邊而能禦虜者萬萬無之也  
臣竊蒿目而憂時事故不舉其細特舉其大未  
言其內先言其外輒不避膏斧披瀝以陳伏惟  
聖明裁察施行幸甚

擬講讀官請 皇太子暑月宮中視學箋  
伏以震宮毓德允資講習之功離象繼明豈間  
純和之候蓋積善如長日加益所宜新之又新  
而學問貴與時俱增要在敏而益敏恭惟 皇  
太子殿下英姿玉裕睿質金相日勤三至之規



孝隆周典德協四重之兆樂應漢歌出閣親賢  
心每嚴夫師宿齋居思道習久遠夫幼儀固已  
體備文明正值躍龍之位章成追琢式符華渚  
之禱頃因赫日之流輝暫輟經帙之進講納微  
涼而靜慮雖曰弛張以時離外傳而深居實則  
作輟可慮况一日不親經史則所習聞習見何  
事能無漸長邪萌而頃刻不近儒臣則所左之  
右之何人奚以發揮聖智尚念禮嚴東序一暴  
猶戒其十寒而景屬南交秋陽幸熾于永夏才

人下銅雀孰與羨墻賢聖之洗心舞曲冠平陽  
曷若熏陶禮樂之益德乘此去溢志庶清明其  
在躬由之浴初陽同乾健之不息臣等材疎輔  
導職愧敷陳冀養正之愈隆輒思暴日以獻當  
談議之久潤竊附減膳以規伏願茂對朱明益  
勤斧藻體 皇上用勞用愛之意雖休勿休服  
聖王念茲釋茲之誠無逸乃逸勿謂九夏爲畏  
景而弛駒隙之虞勿以一日可懷安而貽鳩毒  
之悔則就將匪懈學有緝熙于光明而作述相



仍業闡顯承于謨烈臣等無任惶悚祈請之至  
新都楊永嘉張二文忠公贊

有序

蓋聞危身以定國者不得懷避忌之嫌殫慮以  
抒忠者不必逃枘鑿之迹要以心本無他志同  
自靖則守其所見不强其所不及無損斷斷之  
誠行其所知非阿其所好奚減師師之度蓋我  
朝當武肅之際而時事固難言矣闔濠甫戢  
而黠奸睥睨者憂生于肘腋則宗社安危之秋  
也統嗣交持而聚訟爭鳴者隙開于戈石則人

用趨避之候也維時定計于密而元兇立殄類  
繼恩之鎖閣邁守忠之空頭則有若新都楊廷  
和持論以獨而大禮聿成破膠柱之群言垂不  
刊之定典則有若永嘉張孚敬然一則執濮安  
定陶之議而九死不移卒危身以及子一則本  
追王上祀之儀而一言稱意如以石而投水遇  
有違合迹互差殊故自國老自居之詔出而介  
夫竟無解于人言自逢君取寵之論起而懋恭  
幾不白于天下衆之所衡上之所屈也上之所



簡下之所非也。迺其力辭定策之封而飄然遠引，曾不芥蒂于中，堅拒入廟之旨而毅然不奪。絕不依違于後，安在其門生天子而陰陽人主者哉！其視心一道同之士，異世合符而上爭下和之儔，殊方合志者無以異也。若乃血誠居守，力制外家而舉朝莫識其苦心；屢定經制，深折權侯而舉世罔窺其崖畧；阻東廠之乞封，與除鎮守之求患者，均足銷僉壬之藥，輟威武之草。救與諫延齡之大辟者，均幾陷斧鉞之誅。其表

表大節尤卓乎！可紀者非夫心懸日月，識達經權，持之以大力而矢之以忠貞者，曷克與于斯。是以永嘉易名于蓋棺之日，非爲溢美而新都定謚于易世之後，不謂矯偏是皆史冊之休光。臣工之昭鑒云爾，遂爲之贊。其法主以文肅武皇傳位堯舜之公，誰則決之新都是功。肅皇追王文武之德，誰則成之永嘉是力。彼感遺弓寧遵濮議，詎曰怙私恐干古義。此推一本寧屈衆賢，詎曰取寵慮卽于愆。守其成說，濱死不



寧海齋全集  
卷之八  
論  
三  
搖父子一心大節以昭禮顧所安過猶不及終始弗阿大節以立當其居攝中外震聳隻影周旋皇圖克鞏亦越定制詭遇庭盈紛孽是扼逆鱗願櫻曰門生朕和則奚解曰臣令君敬亦不駭心無規避道豈委蛇各行其志生死以之亨屯更始易地則然蹇蹇匪躬孰後孰先啞彼臆論劣哉耳食爰揭忠貞是欽是式

京營戎政考

國家自高皇帝迅掃胡元混一區宇宿重兵

南都凡四十八衛迨文皇帝定鼎燕京在都門內爲衛七十二畿輔內爲衛五十通計其兵不下五十餘萬凡以居重馭輕大示威武制至詳也又選山東河南中都大寧等兵更番上操以壯軍勢既統以五軍營而復司寶燾令旗則有三千營神鎗火器則有神機營此所稱三大營者是已其後武備弛于承平人心習于玩愒爰有已巳之變而于忠肅始創爲團營之制乃於三大營內選驍勇爲十營還其老弱歸原營



寧波齊全集 卷之三  
曰老家營蓋一變也正統復位悉更景泰之舊而團營廢然其後不能不復也成化初再廢然其後又不能不復也特其法倣原制而增爲十二營合中外兵各八萬而外兵仍分兩班更操見操者凡十二萬行之既久闡茸者衆則更立聽征之制蓋又一變也嘉靖庚戌之變議者以十二營無紀難制乃復三大營而易三千名神樞有勲臣司總督有少司馬司協理有臺省司彈壓而五軍樞機等營則各設副將叅將遊擊

制益詳焉蓋二百年來復而廢廢而復凡幾更矣而總之非主于分則主于合其故可考鏡也然分以懲合之混而不究其所以混合以懲分之渙而不究其所以渙無惑乎轉尋于弱耳獨不思永樂初犁庭搗穴而伸威絕域者非三大營乎乃後何以靡也景泰時制精勢盛而兵威復振者非團營乎乃後又何以罷也夫使選閱訓練盡如國初剏造之時勵精講習悉如諸臣發憤之日將必知兵兵必知伍尺籍無虛隸衣



糧無冒支熊羆必列于行間貪猾不消其銳氣  
則合之而可使人自爲戰有超距奪蓋之勇分  
之而可使同心戮力有臂指表裏之勢此安患  
無兵哉乃其後職黜陟者循毀譽職提督者養  
聲望而職典操者非結交以延譽卽刻削以自  
封其聚而操也等兒戲其散而處也化烏有按  
月支糧者盡貴家之所養而荷戈者無宿飽之  
勢應點見操者悉顧募之無藉而強力者供私  
役之命工影射者可使市井爲行伍善賄脫者

可使少壯爲老弱兵安得不耗勢安得不靡蓋  
從古軍政之弊未有不由此者而邇爲甚故愚  
謂當今日而議京營有全盛之時無全盛之勢  
無積弱之形有積弱之實此不可不深思其故  
者夫惟方泰倣隍未雨徹土安得不熟察于前  
後分合之際而致嚴于強弱盛衰之本也作京  
營戎政考

漢文帝誅薄昭或以爲仁厚中有英武田  
叔燒梁獄詞或以爲善處人母子兄弟



之間二事寬嚴得失若何對  
昔漢文用柔道理天下而景近刻薄致相懸矣  
迺誅薄詔似嚴燒獄詞不問似寬與二主面目  
不類而論者謂帝仁厚中有神武田叔善處人  
母子兄弟間蓋俱趨之愚竊以爲未盡然也人  
主所爲遏亂萌而杜後釁者獨特有法法者天  
下之公情者一人之私情可以通法之窮而不  
可以廢法之正情不簡法則顯與天下共棄之  
而公固公也情可權法尤當顯與天下共議之

而私亦公也故舜不得以天子撓士師而周官  
八議正以善法之用萬古莫易今試取二事議  
之母后之弟與同母弟親不敵也舅氏之分與  
親諸侯王貴不敵也從代來與平七國功不敵  
也昭何人斯而敢殺漢使是無天子矣無天子  
是無先帝矣太后縱甚愛其弟獨不爲先帝割  
愛乎且不忍加誅而令勸諭之復往弔之何委  
曲也故謂帝仁厚中有神武可謂神武中卒不  
失爲仁厚可乃獄詞之燒何爲者彼謂梁事不



必問乎是長無將之罪也謂獄詞不必具乎是  
棄案治之命也謂寧誅天子法無寧傷母氏心  
乎是獲先帝之靈也向使鄒陽之計不必行而  
帝怒方未已將以奉使無狀案叔叔幾無處所  
矣以賄賂交通并罪梁梁益無噍類矣抑以溺  
愛縱奸尤母氏母幾及黃泉相見矣此於母子  
兄弟間不愈甚乎爲叔計者胡不具詞稱曰梁  
王罪坐不能禁戢勝詭令得爲奸王實不知固  
不得與貫高張敖事等而况其親其貴其功有

足議者當吳楚歷梁漢業以梁委之矣使梁王  
不忍死禦敵何論山東非漢有縱亞夫能從天  
而降恐未易旦夕乎也是其功上足報天子幽  
足告先帝近足詔天下遠足示萬世且也梁不  
以此時反而待今日乎願陛下量從末減削地  
限封而仍著爲定格令議不梁王若者刑罔赦  
豈不仁厚神武竝行不悖與誅薄昭事同垂不  
朽不出此而以苟且朦朧免是使梁王功罪卒  
不分心迹卒不白者惟叔使漢室典章竟不明



天子恩威竟不著者惟叔使太后以愛子故紊國憲而蒙不韙名者惟叔使後人有跋扈心而異圖僥倖者亦惟叔無一可者也雖然文不能防閑昭而警蹕傳位之許幾與鄭志埒履霜堅冰所自來矣然失而能斷懲薄而必于竇庶幾擇後是以替前非而景竟上制于母氏之憂懣內惑于王后之微中下奪于田叔之巧對夫君側至崇嚴也而使錢神得入之宮闈至邃密也而使外言得投之生殺至大權也而令內言得

轉移之其何以訓假令有盜長陵一坏土者藉后宮爲解亦將置不問乎此其開釁啟禍有不獨廢法已者終武之世而竟坐國除未必非此濫觴也繇斯以譚二事得失不待智者決矣謹對

獨此最爲有得論

武皇帝藉文景富厚之業制縣寓宅海內願奢慾大罷民以逞元封元狩之間百姓囂焉喪其樂生之心其不爲亡秦續者幾希矣獨改紀正



朔爰用夏時殆庶幾春秋居正之義云夫自渾  
元剖判三才杳分萬物滋于因敦而天統明若  
于赤奮而地統著格起于攝提而人統正故三  
統遞更于夏殷周之世要以裁成輔相以左右  
民非人孰操其柄而祖龍不道至移歲功于淵  
獻之鄉表標季于四序之首何不經甚也赤制  
啓符因陋習非禮樂不興于馬上謙讓未遑于  
璣衡此洛陽少年所憤惋而嘻而帝也一洗秦  
政之穢特纘明德之服太初一曆無異追曦馭

于虞淵揭蟾蜍于晦冥也豈不庶幾有得哉愚  
特病其所得者敬天勤民之事而非其本也治  
曆明時之文而非其實也欽若敬授之跡而非  
其要也且夫曆果有初乎吾不知矣曆果無初  
乎吾不知矣粵稽蓋天肇自皇帝帝始師大鬼  
歷具茨受道廣成子曰無搖爾精無撓爾形及  
遺珠玄水之陽卒使象罔得之夫象罔則無欲  
無欲則誠誠則天矣故談者謂帝之心已具一  
甲子彼大撓鬼區斗儀容成官也而非其所以



官占日占月蓋天法也而非其所以法地足地  
軸天表天樞迹也而非其所以迹有味乎言之  
矣夫武皇之心奚啻有欲乎其精與形奚啻搖  
乎撓乎嗚呼仰而觀之蒼蒼者天耶亡其有屬  
意而寄命者耶天所寄命惟民心所屬意惟君  
心故君心一天也其耳目則三光也其七情則  
四時六氣也其爵賞祿授則飶風卿雲也其刑  
威殺伐則豐隆列缺也乃其志則斗柄天樞也  
帝而果有得于天時人事之紀謂宜調劑其情

性均節其治化使精融之極徹于肺腑洽于埏  
垓而通于玄灝豈其一事不檢以干天和而廢  
歲功乃志一淫于瓊宮瑤臺而建章示侈明光  
朱鳥益奢蜚廉延壽通天太液極靡豫章荆揚  
之間多枕骨矣不曰火見致用日至而畢歲序  
足稽乎志一戕于嚴刑峻誅而見知則法故縱  
則法投鉅沈命則法因諸請室之中多骷積矣  
不曰糾虔天刑順陽助生歲序足稽乎志一溺  
于登封望幸而陳寶薦誣木偶恣妄矚眈肆詐



東井三能之弗矯舉以諛介丘蓬島之上無虛  
日矣不曰分至啓閉則望雲物察災祥歲序足  
稽乎志一動于珍竒玩好而拘醬竹杖則索天  
馬葡萄則索牛女星月之間有凡槎矣不曰日  
至養微潛師閉途歲序足稽乎志一騁于東征  
西伐而犁庭絕漠窮嶺脫而膏伊吾營頭櫬槍  
亂于上而哀魂赤鬼號于下矣不曰折膠則樹  
冬夏不興歲序足稽乎概帝所爲皆足以銷日  
月之光獵三靈之流于太乙之象而傷五行四

氣之和卽察璣衡齊七政而璣衡七政豈爲我  
有也者卽協時日同律度而時日律度寧爲我  
用也者吾故不敢謂其有得也蓋自不邇不殖  
敬勝義勝之主宛然祇台心法而徽猷善政如  
合符節故夏后殷周不同曆而昌禹湯文武不  
襲歲而王帝方跡羸秦之亡而思纘禹服之舊  
希不失之矣不然膠東三策洞悉天人其言用  
夏之忠從商之質而損周之文時政無切于是  
帝胡不與夏政竝舉之而獨此一事爲兢兢哉



善乎上元之訓曰汝性暴性奢性淫性酷性賊  
五者日居于營衛之中雖慕長生徒自勞耳鳴  
呼倘亦廣成之旨而切中帝之肺腑哉吾于正  
朔奚取焉雖然有王者起必來取法則帝之謂  
也遍閱武紀抑亦空谷之足音矣是爲論

駁文中子好詐論

文中子曰惡衣薄食少思寡慾今人以爲詐我  
則好詐焉惜乎夫子之說君子也駟不及舌何  
者儉約美德也飾詐僞行也美則可好僞則可

惡此兩者不並存久矣世俗不察儉約之真僞  
槩以爲詐而惡之是用惡者頗也吾亦不察儉  
約之真僞槩以爲詐而姑好之是用好者亦頗  
也以頗易頗其誰能救之夫世風之靡也奢勝  
儉侈勝約也世情之日趨而日詭也許亂真也  
始則薄樹之標以厚收其譽終則陽藉其譽以  
陰濟其私蓋詐之害世有甚于真奢真侈者矣  
然因有飾詐者而概舉世之皆詐則君子不忍  
焉卽或明知其詐矣而直窮其爲詐猶或不忍



焉何也詐者乘其美而竊之以爲名吾欲因其  
名而導之以植節夫是固不盡人之情也然而  
未聞以詐爲可好也噫詐之與真不可同年而  
語明矣真之所露蔑弗真也詐之所露蔑弗詐  
也迹可掩而神先告之由可勉而安或背之巨  
可矯而細輒忽之始未嘗不致飾而未稍厭棄  
之故詐之所能欺者衆人之聽睹也其所不能  
遁者聖賢之好惡也君子憂世之日偷而思以  
變易之不在程以憤激不情之論而在辨真僞

以決之趨慎好惡以端其本其人真也吾曹好  
之可獨好之亦可其人詐也吾獨惡之可曹惡  
之亦可好其誠而不別其詐或以墮吊名之術  
惡其詐而力獎其誠益以崇忠質之風安在其  
好惡拂人之性而顧能以挽世救俗也何也彼  
驚奢侈而嫉儉約是積漸之溺人也其知飾詐  
之爲非則藝德之好惡猶未盡氓于人心也自  
好詐之論出而人始爽然迷其真性矣故使世  
而從吾言也將相率爲詐而害儉害約者愈衆



使世而不從吾言也將競議其非而去奢去約者益鮮無一可者也夫文中子不擬孔子乎吾卽請以孔子之言駁之夫子憂衰周之末季而曰寧儉寧固約失者鮮何其思之深慮之切而持論之中正若此也不得已而以身維之則曰如用之吾從先進使夫子而曰人皆以先進爲野我則好野焉然則先進其真野矣而世之不爲後進者亦寡矣晏之節儉也公綽之不欲也文子之不言笑取也豈皆誠者與迺夫子不忍直黜其詐而於嬰無貶詞於枝曰豈其然於公綽則欲文之以禮樂蓋取節之意未嘗不惓惓焉吁聖人之意微矣

爲之在我者當如是論

人臣不可不盡其在我而其心實不可使知有我夫人業已委質爲臣矣天下事誰非我者凡我所當爲我所得而知也我所不能爲卽我所不得而知也惟心有我無論舉其在我而委頓屑越之卽使見我之責任彌重而失得成敗之



寧海齋全集 會言  
慮彌深安在其不二心而能畢其分于我故上  
臣事君其誠積于已之所不自知其感極于人  
之不我喻而皆自不有其我始嗚呼此爲之自  
我當如是仲淹所以知無不爲而爲一代純臣  
者也蓋惟一心可事十君二心不可事一君人  
臣而一有二心也豈必計榮辱論利害而躊躇  
首鼠縮朒不事乃爲虛其在我卽我負其責而  
慮或清議我我竭其責而慮或苛求我我有所  
幹旋彌縫于事勢之兩難而慮不能深諒我皆

私也則皆知有我之累也夫我所可以自殫者  
惟此一心耳夔夔而底豫一德而怨艾几几東  
土而召風雷夫豈有所計較遲囿于其間哉彼  
皆不私其我而我自畢我畢其自 而我不尸  
無所爲而爲之者也故古之純臣其身無日不  
在于失得成敗之中而其心無息不出于失得  
成敗之外其視我所可得知者無一非我而我  
所不得知者無一爲我審是非不問禍福卽隕  
擯勿恤也守素位不慕華膺卽功名勿驚也質



衾影不飾形迹卽意氣勿尚也素絲脫粟以自澹泊而非爲矯節歲寒板蕩以自磨礪而非爲沽忠可使明夷連蹇以矢貞而不辭艱瘁可使櫻鱗觸霆以伸節而非有挾以犯可使于巷自牖以爲遇而不避委蛇無非不有其我而獨見夫在我者當如是爾蓋夫人盡我之心與私我之心不兩用而爲之當如是與不當如是則其幾不兩立而每兩神故有如是則是如是則非者此在我之一定而不易者也有於彼如是於

此則非顯據之則是而隱揣之則非者此爲之易地而皆然微眇而難窺者夫孰非我也惟不有其我而我常虛虛故能致身以殫赤亦能處事以應機能兀立于風流波靡之時而亦能轉移于咄嗟轉盼之會能明蹈天下之所不躓而嘿燮夫氣運之所難維其寃至於旋轉乾坤安戢寰宇天人交應而人莫測其自此於爲之自我者分毫曾有所增而實其分毫無所有者始也考之後世惟孔明鞠躬盡瘁可爲世法而仲



寧波府志卷之八 節議  
淹之心若同一轍彼其以天下爲已任誠有所  
本豈苟而已哉雖然公之爲至富弼諸人不能  
識而上殿爭如虎下不失和氣又何休休也吁  
夫無諸葛不計成敗利鈍之心而能布公集思  
者誰哉信哉人臣無以有已也

正直忠厚辯

夫正直忠厚之難辯也非其岐而顯相謬戾之  
難也惟其合而互相伏匿之難也爲正直之說  
者曰吾將壯頰盛氣排詆背憎之爲得乎而雅

道傷矣爲忠厚之說者曰吾將委蛇擊曲模稜  
俛仰之爲得乎而士節毀矣夫離忠厚而言正  
直此悻悻者之所托而時受激烈之利亦旋受  
標榜之害戒薄德者能躋之外正直而言忠厚  
此容容者之所甘而偶受陰陽之福亦卒受姦  
阿之禍羞污節者能耻之是不待深辯之而後  
辯也惟夫侃侃風裁而非必借已之正以形人  
之邪諤諤持論而非必詆人之曲以明已之直  
斯不亦正直而不詭于忠厚者與然一有矜尚



氣節之心而特假渾厚之迹以蓋之且併渾厚之名而收之猶非正直之真也盟心以交而不難析肝膽以相示卑已以庸而不難剖藩籬以相結斯不亦忠厚而不詭于正直者與然一有陰相倚附之心而姑假忼慨之迹以文之亦併忼慨之名而竊之猶然忠厚之累也夫所謂正直忠厚云者泰山喬岳以爲標而重淵深谷以爲量青天白日以爲心而春溫夏燠以爲度陰凝氷堅以爲守而和氣甘潤以爲施故有時乎

不避親怨不顧威利遇事敢言孤忠自許而心苟無僞則是非相成不爲矛盾道義相維不爲崖異雖無忠厚之迹忠厚自若也是真正直也有時乎釋躁以恬夷忿以平與物無忤於世無競而心本無營則意氣相投不爲養交情理相遺不爲忍垢雖無正直之迹正直自若也是真忠厚也蓋士人所爲立身立朝者惟此心心一而已廓然太公爲正感而遂通爲直中心弗欺爲忠真性弗雕爲厚惟不識正直忠厚之自而



以感慨憤激爲正直以優遊詭隨爲忠厚故悻悻非也匿悻悻之迹而逃之于觀望尤非也容容非也匿容容之迹而相尋于偏黨尤非也故欲辯正直忠厚之真者當辯其所以正直忠厚之心心有所爲而爲則或顯悻悻之以行其私或陰竊之以濟其私而失則俱失心無所爲而爲則或行不同而心則一或迹相反而實相成而得則俱得不此之辯而徒於其迹焉論之其不以杜欽谷永劉棐楚之徒爲正直而以胡廣蘇味道之徒爲忠厚者無幾矣是爲辯

惟君子爲能通天下之志論

君子不能徇天下以求同而卽通之以其無所徇之心天下之心一則志一也有所徇而塞無所徇而通君子內不見已外不見人而惟見此大中至正之理虛中以應而毫無與焉用能不出戶而通天下如轂虛輻湊造合轍之車而天下不能外也夫是之謂同人蓋易之言否泰也上下志同爲泰志不同爲否故受之以同人而



曰惟君子爲能通天下之志夫通天下而以其志也則所謂同者從可識矣酸醎甘苦不同味而同調故天下之味通焉非夫水以濟水之謂同也清濁高下不同響而同節故天下之聽通焉非夫琴瑟相比之謂同也剛柔燥濕不同氣喜怒愛憎不同情而同理故天下之志通焉非夫偏私阿徇之謂同也何也志本乎心合乎性而歸乎理人雖上聖與下愚其常性同則其志亦無不同動于意而公私辨焉有私卽不能無徇

徇于此卽不能無隔于彼故曰私于家者隔藩墻而分比隣私于我者隔形骸而分愛惡志不通而能同人者無有也顧有意爲隔者不同之害同易知有意爲通者小同之害大同難見男女睽而其志通而不類族則婚姻無別萬物睽而其事類而不辨物則品彙無章故欲有所優容茹納以爲同也而包羞之愧生矣欲有所纖趨依合以爲同也而咸股之吝起矣欲有所攀倚繫援以爲同也而剝削之困萌矣欲有所委



蛇與順以爲同也而喪斧之凶兆矣欲有所轉徙遷就以爲同也而無首之悔無及矣如是以通天下之志也不亦悖乎君子知夫人心無體則無際無際則天地在其中人物生其中鬼神行其中萬化萬變皆出其中何往而不一又何往而不通也惟心之中自起心焉而妄見妄疑則負塗載鬼之爲見其失也孤妄作妄止則車曳牛掣之爲累其失也阻妄意妄念則往來朋從之爲思其失也擾故虛以宅此心而條理辨

初其道文明公以秉此心而剛決不回其道以健無思無爲無偏無倚以止此心而永貞無邪其道中正文明則如鑑之照物無弗燭也以健則如雷之解物無弗釋也中正則如四時日月之錯行代明無不止其所得其理也遵道而行內不見己之可徇而烏乎壯煩以爲怒無私怒而天下之有同怒者通矣無爲守正外不見人之有可徇而烏乎來兌以爲悅無私悅而天下之有同好者通矣悔吝憂之其介而出處語默



動有攸利應違決之其幾而幽深遠近無微不至  
入大師克而伏莽之敵以消出門交而于野之  
亨以協蓋大其心以觀天下之志而其志得合  
天下之志以正一人之志而志自通如握樞運  
物而物惟所旋轉焉彼所謂易則易知而同心  
者衆簡則易從而同力者多故曰易簡而天下  
之理得而成位乎其中謂此物此志也此之謂  
大潤而不私而君子所以制否泰之運開豫大  
之基者必由之也善哉聖人之繫易曰天下何

思何慮又曰惟深也故能通天下之志夫深  
其靜淵停不可淆以端倪其動良止不可撓以  
應感故曰天下之至神不明于深之說而思慮  
萌起道乃失正卽見不統一道未光明無論翕  
訛蹲沓之輩模稜調停之說徇于私而非同而  
徇意氣則顧厨之標榜徇名理則洛蜀之詆譏  
其害同均故惟知不同之同者可與言大同此  
和同之辨聖人又不容不諄諄也

人行天下之大道論



大人欲範天下於大道必以大道範其身道公而不私行道者必由乎大公之途而不得以私與故道不足以範天下不謂大道行不合天下以爲大不謂行道夫欲合天下以爲大則必有捐乎一膜者矣是故其動光明其履潔素志貞而行則通用員而守則方正行不失泥旁行不失流行所獨信不必衆見之也行所曹信不必不衆見之也夫是故能盡轉移變化之妙適進退存亡之宜而不窮于用其惟大人乎何者大

道之途廓矣灌莽荆榛人則翳之大道之用宏矣町畦畛隰人則封之大道之行夷矣坎窞律率人則咀之大道之歸致一矣旁谿徑竇人則岐之故辯不析鋒鍼是冥行也趨不視塗轍是錯履也行不顧其所安進不究其所終是自蹶也不祛胸臆之見不除莫適之私而欲盡大道之量是逆施而背馳也嗚呼大道之行始乎心術係乎人品厥惟嚴矣凡以天用者卽爲大道以人用者卽非大道道心人心之別也以天用



者可以一人通天下可合天下爲一人而人用者方寸而藩籬生眉睫而荆棘列咫尺而九閭千里隔故曰其人明白正大曉然而可知必大人也其人幽隱深秘望之而莫測必小人也此之不可不審甚矣書云蕩平正直易云中行言大道也然不去偏黨反覆不究蕩平正直之用不有馮河獨復之勇不足與中行故行大道者化而成心革而邊見寧昭昭毋察察寧坦坦毋間間有舍己以從道不強道以合己可以身徇

道卽可以道徇身道當行咸其腓可也何必不拯其隨道當止艮其趾可也何必不勝爲咎株困之爲塞而連茹不爲通冥豫之有渝而介石不爲固順適于陰陽剛柔之用而毫不膠以其私故靜可質衾影動可對天人曠乎揭宇宙而行而無非譽非大人孰與于斯雖然孟子謂得志共由不得志獨行其道夫不能無愧于獨知而合天下以爲大者未之有也知此者進乎道矣



四維論

管子謂國有四維柳宗元辨之而均非也夫國有與立則禮是已禮者與天地終始者也宜而義辨而廉莪義傷廉而爲耻故夫上下辨民志定國耻振物耻與無非是物也昔者生民之初朝夕搏擊爭命禽獸聖人爲之衣食居衛以蕃其生而民乃驚于生而亂萌起則禮以坊之服物采章於是乎正規矩準繩於是乎在坊表壇宇於是乎植善惡枉直於是乎別辭讓羞惡於

是乎生聖人非好煩其迂節而本乎性溢乎情合乎義凡求達乎人心所不容遏故民習焉安焉不言廉耻而國用治夏后殷周之際代有損益以救季世救有得失而理亂分執此提衡百世莫之易也孔子論有耻且格本于齊禮而田齊之亂謂惟禮可已之夫禮亡而國可維者寧有是哉禮之精以治身緒餘以爲天下國家然未有身之不維而能維國者令天下各安其分各止其所而莪義寡廉冥頑無耻者鮮矣聖人



逆知民散于道失俗殘于教弛非耻無以振之  
故佐之刑以激發其羞愧之良而命之曰典刑  
典者禮也謂律以禮定耻以禮興也若將曰爾  
胡動不顧禮而淫破義污賊廉其僂辱而不耻  
故耻爲禮防也爲衰世設也非聖人意也善乎  
賈生推言之曰禮坊于未然之前刑禁于已發  
之後夫坊未然者其維深禁已發者其維淺聖  
王經國嘗欲養其耻于未喪而不盡其情故制  
爲夷易之軌以導之而且從善與之路自新開

其機使之樂循而不知輓世刑煩而玩滋甚至  
節罪罟寧荼毒非惟不足振其耻而耻反喪則  
禮亡而國隨之矣以此知禮者維之本也夫耻  
直還以維此禮者也惟不識所謂禮而目爲亂  
首其究至于非聖滅秦清譚禍晉周之季也共  
主奄奄猶足折請隊問鼎之雄卽管子仗義服  
楚亦惟是包茅王祭讓之以禮故曰禮之可以  
爲人國也夫葵立亦一徵也要之管子非知禮  
者故埒四者並論而曰一維絕則傾二維絕則



危三維絕則覆四維絕則滅此未循其本也今管子書具在無非籠民以術以資富強潛以功利奪其好禮之心而濟其假義之私凡所謂不掩惡爲廉不從枉爲耻者皆爲公戰計也勲烈幾何業已密解其防維矣犯分傷儉身則干之何以維國管子沒而齊大亂傾耶危聊覆耶滅耶則何也管子所謂禮者不循其本而孟子所云上無禮喪無日矣嗚呼上以禮維國下必以耻自維耻者正人心所不容遏上能振之非上所設也耻一喪而蕩檢踰閑瓦解川潰不可收矣宗元立論芒寒色正而謂廉耻爲小節夫不知廉耻烏識禮義卒殉叔文與張禹孔光許敬宗同類而醜詆亦向者管氏所羞也故嘗爲之說曰治世用禮衰世用耻齊民以禮行已以耻以此相維卽與天地終始可也

寧澹齋全集卷之十二終



蘇

數之也夫不數君子之

不故論君子者數之也且

不也天下有真品格因神

神理品格各天然中庸

托於其途或以偽君子

以偽中庸而論君子之中庸

以中庸而核君子之真

正以君子而核中庸之

而試提衡於彼之間

之而解其意君子於小

君子之中庸可思也夫

試隱於真似之小人

不必提意君子於小人

子之中庸又可思也彼

中庸

卷之二十一

中庸



